


陳學士文集

五



陳學士文集

(五)

陳儀著

編主五雲王

編初成集書叢

集 文 士 學 陳
冊 五

中華民國二十五年六月初版

著 者

陳

儀

發行人

王

上海河南路

雲

五

印刷所

商

上海河南路

務印書館

館

發行所

商

上海及各埠

務印書館

館

壽

陳學士文集卷十三

祭文二 誄

祭張懷勉齋文

嗚呼。君之齒少於予十一歲。早豐且達。無怫鬱坎壈之遭。神王氣純。何以至是。平生孝友。培其根而旣其實。施於戚友之黨者厚矣。初典大郡。約己利物。志勤於理。謠頌滿兩河。俎豆君者。皆祈君於天。君於天人之理。可謂無負矣。嗚呼。孰司君之命。令君至是。君之筮所仕於神也。神兆以慶。探符得懷。故志與神誓。政所覃施。允蹈其言。孰意君之終於慶也。予別君在辰之冬。而君之任以癸之春。方在京師。未獲祖送。是秋下第。君以書來慰。勤懇備極。嗚呼。予之爲散木也久矣。十年殘客。九北窮途。而又性褊氣忮。動忤於人。唯君通其素心。涵以汪度。振乏如不及。而急病唯恐後。人所忌而君愛之。人所避而君睺就之。人所側目戟耳。而君以爲若當然者。浣煙樓中。怡聞堂上。縱酒使氣。任誕疎狂。終始歡然。無所間。若是者。徒深知予耳。嗚呼。勉齋。予何以忘此哉。去年夏。急友人之難於上谷。午寐夢君方舟而飲於河。酬酢方譁。君遽登岸別去。予力挽之不住。彷彿前年遊土城時光景。是時未審病問。豈永訣之兆。現於神魂之交也耶。今春幸叨一第。備員禁林。而君又不及見也。然而地冷官冗。奔走救口不及。形骸神索。假令君在而見之。其愛我急我。又當何如矣。嗚呼。勉齋。從此已矣。伯倪戢憤。泉路相逢。頗應不寂。惟予孑然。失鍾子而流水絕絃。亡郢

人而成風輟技。祝予之痛。長此百年。寧第笛咽山陽。淚洒黃壚。區區悼逝之感哉。生芻絮酒。昭鑒匪遙。

祭張魯菴方伯文代鄭伯倪

昔謝公亡後。羊曇不忍由西州門。夫撫今感往。觸境生悲。山陽咽笛。黃壚淚洒。情一往而深。況風義締乎再世。知愛積於生平。世故滄桑。俯仰輒變。人生夢幻。理數難憑。悲來填膺。恨深銷骨。夫復何言。維公挺不世之才。負靡前之氣。包含宏大。開濟明豁。是以清望著於臺省。殊績章於方牧。聲華騰於藝林。誦義周於士類。固無俟乎揚摧。而某亦不能殫述也。若乃赴義若渴。求才若飢。踐一諾如詛盟。揮千金如草芥。以某所見。惟公一人。迺其峻骨山立。汪度淵淳。瀉言泉於當機。銛心鐵於錯節。喜慍不形。險夸一致。應猝愈暇。蒙難愈貞。某雖淺識。竊有以窺其一斑。嘗以世講之末。預酒坐。接琴言。見其舉杯徐引。嘯咏閒暢。旣而巨觥屢空。鉢韻相屬。毫揮風雨。聲振金石。雄襟颯舉。逸情雲湧。太傅右軍。諒無以過。而某以樗櫟之材。疎慵之性。面不能逢。世口不能悅人。儕伍之所竊笑。流俗之所輕也。公獨過愛而深器之。獎藉誘進。有加無已。嗚呼。古人有知己之言。卽沒身不能忘。如公於某之分何如也。且人生當快意時。往往意氣之盛。籠蓋一切。迨身經多故。漸就銷沈。或失聲於破斧。每變色於蠶蠹。若夫利害不撓其心。死生無變於己。惟達人能之。公未歿前一日。某往候焉。形將委而神王。氣弗屬而意閒。此其視死生爲晝夜。可謂達命之情矣。雖覆卻萬方。陳於前。而無以入其舍。然則盛不足爲公喜。衰不足爲公憂。人世之豔羨詫愕惋惜而悲涼者。以公視之。皆所謂觀場而占夢也。獨是流波之引。絕絃而不御。成風之技。輟斤而不試。昔人所痛。寧獨在今。

然則某之所哀不在公而在己也。嗚呼！明冥路隔，神爽有期。叫秋是其能通，俾九原兮可作。尙鑒予誠，來歆來格。

祭查墓園文

嗚呼墓園，乘化何之。悼一塵之永隔，思再見以無期。伯牙息流波於鍾子，莊叟輟風斤於惠施。悲絕絃之高張，索解語其伊誰。況交親零落之後，正餘生衰暮之時。猗嗟墓園，丈夫之雄抱不羈之才，精鉅閃霍如龍劍之躍冶，挾無前之氣，光影滅沒，似天馬之行空。若奮身逢時，早已樹功效能，揚其芳烈，乃潛鱗戢羽，尙能出奇破險，脫彼屯蒙，泊乎才隨識老，氣以量銘。雖智慮絕人，而知白守黑，每引身於局外，故虛懷容衆，而執雌守下，猶氣蓋乎關中，聲聲雅人之度，遂遂君子之風。善夫賈生之言曰：天地爲鎚，造化爲工，陰陽爲炭，萬物爲銅，是以貴賤貧富，順逆窮通，莫不乘運數而遞至，以鍛鍊乎我躬。或志氣抑摧，一蹶而不振，或心情散佚，有始而無終，實昭質之易虧，亦何恨乎磨礱。獨豪傑與賢哲，不變異於遭逢，玉以攻而彌潤，金以鍊而愈融。猗嗟墓園，諸艱歷試，約秦殊途，險夸一致，當阨而意氣自豪，履亨而形神不肆。惟存乎我者恆一，故感於物者不二。洵令終之有淑，蓋多福之自貽。猗嗟墓園，雅善知人，世舉肥以相驥，君聞絃而賞音，聿溯締交之始。實維沾水之津，予於斯時，嚴取舍而慎游從，人乃目爲迂怪。遠聲利而絕徵逐，君則重其清真，聞名結想，覲面披襟，迹似疎而意密，形若淡而情親。夫君之所與共角逐而供驅策者，亦云衆矣。至於託死生而濟緩急，則惟予是詢，予亦竭其才之不逮，而忘其力之難任。於是同聲相應，未面傾

心李碩園纓冠而排難。周有聲攘臂而釋紛。無不寫素心於白水。何曾寄然諾於兼金。成交游之佳話。時傳播於說林。嗚呼。俛仰廿載。耆舊凋殘。餘君與我。共此歲寒。閱暄涼之狎至。觀物態之變遷。今胡爲而雨散。昔何故而蟬聯。屬纖續於鼻息。爭毫釐於市廛。絕交論所由作也。谷風篇何以稱焉。唯良朋之耐久。固磐石而方堅。風雨晦而音不輟。霜露零而色逾鮮。時有無而代置。每推解於急難。予不自覺其率爾。君亦視之爲固然。由肝膽之弗隔。故形迹之盡捐。嗚呼。慕園長此逝矣。渺渺人天。胡屈胡底。頃四月之既望。來夢中而相視。被雲衣之容容。垂玉佩之粲粲。若遠游而告以將行。問何方而不言所止。蓋神爽之先知。示交期之永已。嗟霜柏之孤生。失喬松之輔倚。嗚呼。魂歸天外。無煩宋玉之招。誼著人間。聊作安仁之誄。絮酒陳詞。形留神駛。鑒我哀忱。不遠伊邇。

祭馬个臣文

嗚呼。公之年九十有九。乃乘化而返其真。無可以爲悲。惟世之愛公者。或莫知公。知公者又莫能名公。名公者或反失公。則後死者之責也。或曰。公無情。四十年去其家不一顧。夫人苟無家。可以累心者都盡。情死而神生。公殆乎仙。然公焦然如衆母。徇人之憂如不及。不必其所知與所賢。解衣反冬。推食哺飢。日營營靡遑。而無以有已也。公之情不旣多乎。或曰。公常蹈水火。拯其人而出之。而不矜不伐。公近乎俠。然人有非義若簞豆。則大怒絕去。雖親暱不少恤。如其義也。聞而赴之。無論知與不知。然則公犯難而爭義耳。非俠也。或曰。公廉。嘗兩從軍。有官勳。皆推以與人。後復以招民敍功。當授令長。有友阨於選人十餘年。其

家喪亡略盡公遇於吏部慨然以己所得官易名而讓之更入貲需次十餘年乃得大治令大治俗慄悍連山數千里莽伏者時出劫掠執前令而沒之江幾死公至爲蠲除一切申約束與民更始閭左於官吏無一錢費皆大悅深箚邃谷鳥言獸面之倫咸來城市於是夜戶不閉道不拾遺所謂無欲而化行者耶然公工醫多禁方嘗遇異人授以丹藥可以蘇枯起羸自王公大人爭迎致公乞其藥公密不與往往出其黃金珍裘善馬饋遺重疊而後與之公乃用以振施平生推解率取諸此嘗稱曰損有餘補不足天之道也富貴人所重者身命所輕者財賄捐其所輕得其所重何負焉而窮窘者賴此以濟吾爲之作福消愆故往往應手愈寧獨借靈於草木哉或曰公氣高性勁直於物無所避就公卿貴近一語不合輒面折之與人言不可往復百端卒持其意不變對人落落無寒暄其去不可留其來不可卻夫此與古爲徒而不近世情者也然公善體人意未嘗以形迹責人人有過爲隱蔽之多方導之正若恐人知者下逮童僕亦然每言好下人者驕人者也曲傳人者輕人者也與人煦煦者求備於人者也我與人無面從無心非無人我之畛吾焉往而不與人親是故公沒之日聞者莫不泣涕某等之友於公也遠者數十年近或數年或日習於公或時月乃一見人人各自以爲知公言亦人人殊皆非公也然合之無非公者今公之子將歸公而葬於其鄉某等旣無以悲公乃相與定公之名而公卒不可名則名之曰古之真人莊周有言大仁不仁大廉不嘽大勇不忮庶其近之遂以是爲公諱公其鑒之

祭親家孫景玉文

嗚呼。君卽世於今四年矣。自我不見。於今六年矣。庚子冬杪。奉先大人柩歸里。君冒風雪來會葬。偶病寒。留數日。臨別。握手歔歔。以季子爲託。予應之日。吾事也。兄無以爲念。君揮淚上馬去。心竊怪之。微疾暫別。何遽悲慘若是。詎知此後無見期。丁寧數語。遂成永訣也哉。次年。飢驅京洛。一住半載。已又蓬轉江南。歲暮始歸。君屢以書招。言苦相憶。蓋迂道津門。作十日留。以罄積忱也。予以往返愆。欲赴不果。次年正月。接手札。訂季子婚期。予報以四月。屆期杳然。已而聞君病困。心憂之。遣大兒往候。歸言仲子刲股和藥。以進。病稍差。是時予方終喪。奉文書赴吏部。未幾而家問至。言君已卽世矣。易簀之時。念季子婚未成。學未就。執其手而絕。前一夕。呼予者數焉。且言有無窮傾寫。今已矣。嗚呼。君之言。予之心也。尙待提耳而囑之哉。憶自壬午之春。始客君家。一家大小。若奉神明。予性褊率乖錯。而涵之以雅量。浹之以深情。賓主相忘。遂爲昆弟。定盟之日。恰值賤辰。是夜。新月初弦。齋中茉莉盛開。名酒徐傾。清談轉勝。漏刻四下。予旣頽然。君亦酣醉。自是之後。異體同心。憂樂相關。甘苦共之。豈盛衰而能移。與存亡之可隔也。君之子。予之壻。其成敗在予。不在君矣。欲就其學。已令人贅。與兒輩同業。兒輩先後獲雋。其意激發刻厲。文日楚楚可觀。倘能取科第。登仕版。則予藉手以報君之日也。君歿之後。人事日新。年來津門。無復寧宇。君家雖艱苦。而門庭清寂。嫂夫人素善持家。諸子皆能自守。澹泊吾分內也。君其可以無憾。嗚呼。君行有日矣。託體山阿。永此終古。而予以一官繫身。不能親執紼。送君於野。隻雞絮酒。遙寄一言。神爽未隔。庶其昭鑒。

猗嗟淑人。秉姿坤極。淑慎其儀。柔嘉維則。仁孝性成。不聞亦式。養志承顏。女代子職。作嬪我公。同德相孚。虔執籩豆。追念舅姑。秋霜初降。春露方濡。既匡既敕。是究是圖。夫子含香。容臺冷署。素絲厲節。飲冰垂譽。黽勉有無。縞衣蔬茹。清以約成。勤惟儉助。旋登柏府。帝簡惟良。一歲三遷。不主故常。風清京輦。月滿巖廊。從容規勸。斂鍔含銳。哲見幾先。志恬退後。鹿車可共。翟茀何有。舒嘯東山。課耕南畝。榮利無關。升沈亦偶。帝開藜閣。徵校麟經。編摩闡述。三歲而成。篝燈夜午。警旦雞鳴。既奏稱旨。用錫殊榮。公之友于。篤念同氣。迎姊爰宅。愛甥而衣。淑人佐之。朝省夕慰。必腆庶羞。不私一味。澤周族黨。惠洽鄉鄰。婚喪有告。振給維均。風人所咏。施及凡民。無寧問報。雜佩投賓。凡我粉榆。欣依君子。月會旬修。張筵陳簋。楚楚餽核。既多且旨。樽疊親視。盤榻手理。閨門之禮。中饋爲先。習俗驕惰。此風泯然。羔羊之美。采蘋始焉。不修內則。豈曰能賢。猗嗟淑人。蔚爲女宗。高而能降。貴以益恭。克相夫子。奏其膚公。象服山河。委蛇雍容。胡焉奄逝。年不副德。遺掛空存。層檻有恤。芳型云遠。徽音不息。屬在親知。罔不心惻。某等與公。情同洛社。義忝通門。夙聯縞紵。每共琴鐙。習聞壺範。既惠且溫。方歌仰止。遽賦招魂。桂酒是將。瓊芳爰布。撰恨蘭霜。興悲薤露。欲闌遺芬。愧無佳句。靈其來歆。鑒我誠素。

祭師太夫人文代

嗚呼。太夫人之爲婦也。相夫成不世之功。其爲母也。教子建非常之業。故其生也。名聞天子。而其沒也。哀動三軍。此女德所希聞。而古今不恆有也。當夫三黜煽亂。撻伐用彰。九重宵衣。元侯臥鼓。於是天啓豪傑。

之心。忠作山河之氣。投軍仗劍。徇國忘家。而太夫人慷慨贊決。綴甲緝裝。不啻援桴拊鼓。而助之先登也。往必克。攻必取。百戰而集大勳。四命而專使節。威行三楚。恩洽五涼。而太夫人從容區畫。計食授衣。不啻徧席分甘。而裨之拊循也。義聲達於朝廷。德音揚於閭外。泊乎前軍星隕。家嗣龍驤。茹泣授父之書。飲冰勸以前烈。用能奮其材武。拔自蹶張。不席門胄之榮。自結風雲之契。特承簡命。秉鉞海門。遂迎太夫人於公署。當斯時也。某以通家子。隨先人之後。迓於郊。而拜於庭。雖色笑之未承。已徽音之不遠。凡太夫人之所以訓我公。與我公之所以奉慈訓而布之軍政者。竊嘗聞其說矣。士絃於塾。兵閒於伍。農歌於田。商嬉於肆。受賜於公者。皆歸賜於太夫人。是故節制江南之命下。公奉板輿以行也。送者載塗。哭者震野。而祝者比戶不絕也。嗚呼。非甚盛德。曷克致此哉。江南地益大。人益衆。政益繁。公所以治之者益勤。太夫人所以教之者益力。令之行而德之被者益溥而速。而太夫人忽焉沒也。夫江南之人。所以哀太夫人。與哀公之失太夫人者。不知何如。而三津之兵若農士若商。聞太夫人之沒。坐者起。行者止。言者流涕。童子不謠。舂者不相杵也。抑某之哀。又有進焉。昔我先人以邱園之貴。託忘分之交。陪琴酒以雍容。寬將軍之禮數。迨其亡也。眷懷舊契。恤此遺孤。手製哀詞。躬臨總帳。至仁徹於重壤。至信款於下泉。夫受恩之深。則關情必倍。計音驟至。震悼交并。痛孝子愛日之心。起鮮民風木之恨。魂消心折。不知涕泗之何從也。嗚呼。江山渺渺。神往形留。芻酒蔑蔑。詞窮淚竭。

嗚呼。攬萬生之紛綸。孰有形而不敝。感驟驥於悲泉。促浮生以委蛻。唯神理之緜緜。固未始與之同流而偕逝。實人心之真宰。乃造化之根柢。能緣虛以葆真。非哲人而莫逮。惟太夫人。人貌而天。何思何慮。體任自然。其著爲女則形諸母儀。可以範當時而垂後世者。皆其應迹之所緣也。乃若和神當春。沖性如淵。參乎物之所造。達乎化之無遷者。人固無得而名焉。嘗聞天地清淑扶輿之氣。必鍾爲忠信材德之民。故傳言箕尾之降說。詩稱崧嶽之生申。然非秉中和以爲體。則不足以凝其氣而會其神。太夫人之蘊乎中者。雖不可見。嘗徵諸似續之振振。某友伯氏。其德直方。名冠羣公。通顯而不渝其舍。身更多難。摧抑而不挫。其剛仲氏耿介。克儉而良。叔季清栗。咸敕以匡。門高二曲。譽重五常。實與名之無忝。才與位而相當。科第蟬聯。非關富貴福澤之氣。簪纓輻輳。蓋皆中和餘溢之祥。嘗聞時有盈虧。勢多崇伏。崇極者必圯。既仆者不復。豈無七葉金貂。一門華轂。逢時媾會。亦自忘其負乘。運移勢謝。空貽羞於覆餗。非干祿以豈弟。疇令終之有俶。翳本實之先撥。何餘榮而再馥。唯中和之所醞。終敦化於無窮。如江河之行地。猶日月之麗空。山石齟齬。無阻於特源之往。精氣薄蝕。何損於昭明之融。當夫芳藹方壯。忽聞鵲鳩。霜露慘慘而交下。雷霆砰礚而載烈。既蕩析而離居。亦罍罄而疊竭。太夫人處之泰然。了不知其臆。跪謁外物之可必。苟昭質之無缺。觀四時之代序。若晝夜之更迭。識天心之必復。惟益勗夫姁節。光陰彈指。星紀浹辰。帝懷舊德。詔起逐臣。昆弟同升。簡命維新。畀東籬以分陝。式南土而來旬。歸先疇於司里。返故第於宅人。悅久客之來歸。撫菊松之餘今。憬噩夢之易迴。見復旦於陽春。於斯時也。孫枝成長。才調翩翩。連占科名。所學俱有經。

法。或從王事。亦世各能象賢。是皆太夫人含飴之所弄者。或在掌上。或繞膝前。卒以觀厥成。而食其祿。人咸歎羨以爲異。而自太夫人視之。不過旦暮之間。嗚呼。世有去來。性無損益。遺性徇世。心爲形役。榮辱鑠神。得失奪魄。既墮螭而兩陷。卽聚儻亦何惜。安知更有哲人。葆中緣和。以身世爲應迹。惟太夫人足以當之矣。是故齊得喪。無今故。一死生。蓋無人無不自適。然則今之乘化而返真。是謂全歸而復於其宅。敬長跽以陳詞。知神明之未隔。

祭提恭人文

嗚呼。恭人之行。予旣已誌而銘之矣。事實而言質。文簡而意未盡也。嘗論學問之道。效其性之所然。性之所然。學弗能加也。能不失而已。苟能不失其性。雖不學可也。世之好言學者。莫如士大夫。其不知學者。莫如婦人女子。然婦人女子。往往率其胸臆。而成古今節義孝烈之奇。士大夫日言學。而終莫能及。史冊所書。可指數也。乃論者猶謂奇特之行。出乎激烈感慨者爲多。庶幾乎中庸者蓋寡。然如恭人生平所處。非有窮蹙感慨之遭也。生與歸皆世閥。始終貴盛。宜無以見其奇。而尋常日用之間。人情之所至難處者多矣。娣姒多而無一言之間。姬侍盛而有各得之宜。前室有子而子之忘其無母也。庶子有母而母之忘其有子也。此數者言之至易。蹈之至難。世之學者。形骸若封。肝膽有畛。兄弟而不相容矣。朋友而交相擠矣。夸毗之形爲態色。伎求之態爲褊心。甚有同爲君子。而自是而相非。共一道術。而愛同而仇異。加之以附會。搆之以詬誶。其患至於不可解。古今以來。不可勝數。而恭人以閨閣之姿。未嘗讀書談道理。乃所行若

此豈非沖懷天濶。淵衷性澄者哉。乃知聞見之功。無當於踐形。降衷之良。不假乎學。虛而聖賢所言典籍所紀。皆人性之所自然而能者。而非強人以不能者。觀恭人之事。可以知之矣。予與恭人爲親戚。然心儀而敬之。故所以誄恭人者。不言情而言性也。其死不亡。是用降鑒。

祭李太宜人文

嗚呼。女節之盛。基於宜家。章於報國。孝子之義。始於事親。終於事君。其道未始不相成也。昔陶侃之母。封鮮以激廉口。虞潭之母。傾資以餽戰士。雋不疑之母。教子平反。俱能竭節本朝。流聞後世。每讀其傳。未嘗不想見其爲人。今觀太宜人之賢。其識鑒豈出三母下哉。自昔奉政公。以利濟爲己任。族婣鄉里。待以婚葬者。常數十人。斥三千金。起學宮於荆榛瓦礫之中。築濱海之塍。凡七里。以通行旅。義聲馳於州府。抑太宜人實左右之。諸子自髫髻中。既聞而習見。其志量固已超然矣。仲君甫入仕。太宜人卽稱奉政。遺命訓飭之日。吾半生勤瘁。後人有爲官者。願斥所有以供。苟動官中絲粟以營家。非吾子孫也。故仲君之廉聞天下。在官衣食。錙銖取給。太宜人手減季之產。至十五六。季賢能成母兄之志。未嘗有吝色也。夫人情務得以官爲利階。其上者取足自給。不苟侵漁。已足稱清白吏矣。若乃卻長物而不居。處脂膏而不潤。以家佐官。破產從政。豈可求十一於千百哉。是母是子。難兄難弟。卓乎其弗可及也已。仲君爲西曹郎。執法爭獄。囚生死。侃侃無所撓避。堂上爲之動色。推平允者。以君爲最。則太宜人之教也。雋母以反活多寡爲喜。怒。茲何多讓焉。聞其都運河東時。製一裘以奉母。太宜人怒曰。裘何自來。吾雖老矣。正無須此。飭婢封之。

笥以絕後至。嗚呼！此陶母之義也。當是時，都運之名達於上聽，而江撫中丞吳公奏請督理漕儲，報可之。命方下，太宜人卽惻然以糴額廣，逋賦多爲慮，手書誠君，宜思所以寬民力者。且諭季子以轉漕之任，費倍往日，毋墮前志，以終乃兄之廉。嗚呼！兄之廉已成，而季之產減十八九矣。昔虞潭之母，買其環珮爲軍資，發家僮以助戰，賊平，拜武昌侯。太夫人加金章紫綬，詔立養堂。今太宜人破產以成子之名，致位通顯，疊膺綸誥，年近百歲，五世一堂，孫曾至三十餘人，人生之福備矣。誰謂古今人不相及也？仲君治行卓絕，受聖天子特達之知，以江左地大獄繁，擢爲臬憲，將以去貪殘，抑暴扶弱，沛德教，美風俗，而太宜人亦丁甯申誡，故西曹時，然則仲君在官之日，皆太宜人憂惕之年也。嗚呼！此豈閨閣之常？家人之事已哉！太宜人考終，而仲君以憂去職，上特詔留之，蓋慨然念人地相須之殷，故抑罔極之悲，勵匪躬之節，殊恩異數，出乎常格。然揆之太宜人生平忘家報國之心，有默契焉者。仲君必能體此意也。雖毀滅之傷，終顯揚之盛，卒賢母之志，酬聖主之知，垂名竹帛，與古人輝映。太宜人亦可以含笑九原矣。陳詞致奠，奉揚徽烈，尋常哀誄，非所宜施，唯靈其鑒之。

祭王太夫人文代李大廷尉

嗚呼！太夫人之爲女也，以婉孝稱，其爲婦也，視其爲女也。太夫人之相夫也，以敬義聞，其教子也，帥其相夫也。古內則所垂，殆性與之協，而風人采繁，雞鳴諸什，若爲太夫人揚爲芳烈也。然吾以爲太夫人所處，有尤難者，當其歸於觀察公時，文靖公游歷三臺，而文貞公以大宗伯引年予告，門業鼎盛，甲於一時，夫

處隱約者。易厲其操。履崇高者。難貞其度。貴不與驕謀。而驕至。富不與泰期。而泰生。此在士大夫未易消除。而況閨閣之際乎。太夫人天植沖粹。恬泊真素。屏華覲之好。抗林下之節。見者洒然異之。是時董太夫人暨朱太宜人。俱在北堂。而太夫人周旋二母之間。各竭其歡。訴訴然無所問。蓋太夫人爲冢婦。中外親族。無慮數百人。指視交集於一身。而淑慎溫恭。動於禮會。無不有以厭其心。相與嘆服其賢。文靖公每稱之曰。與吾門者。必新婦也。觀察公少有令譽。志承家學。編摹常至丙夜。鐙檠鉛槧。太夫人實左右之。其勤苦刻厲。有寒素之所不能者。雖扶搖之志未終。而燕翼之謀卒遂。司農之風達。豈非天所以償其未足哉。當觀察公之歿於滇也。文靖公春秋高。而司農方幼。太夫人茹痛銜悲。節哀順變。所以奉堂上者。早暮煨寒。饘醢酒醴。一如觀察公在時。而撫教幼子。兼父與師。寢食懷袖之間。無非慈誨。至性淬發。大器早成。是以掇巍科於髫齡。躋臺省於壯歲。文學政事。彪炳一代。爲時偉人。而太夫人履盛而懼。每進益恭。所以丁甯告誡者。皆古大臣退思之義。姻黨中具聞而述之。在朝諸公。爭相傳頌。以爲司農有賢母。故其公清勤恪。上結主知。蓋有所稟而然。孝以作忠。於茲益信也。古之賢母。及見其子之貴。而至行聞於當仁。師法傳於六宮。青史所書。往往而有。如太夫人者。真其人與。夫何年未臻於古稀。而忽焉溘逝也。士大夫聞者。莫不震悼。而戚黨之赴而哭者。莫不盡哀。蓋其生平性善。所以洽於人心。而孚乎公論。有不蘄然而然者也。況如某之肺附。炙之親而習之久者哉。其爲悲悼。更宜何如也。爰酌明水。跪而陳詞。惟太夫人其右饗之。

祭李太君文

竊嘗考古傳記。砥節立名之士。非獨其身賢也。蓋亦往往有內助焉。山濤之妻。陶侃之母。皆能加意賓客。勸勤其夫與子。親仁賢。獲聲譽。爲世偉人。故雞鳴雜珮之義。風人美之。而聖人特著於簡策。誠重之也。求之今世。可稱道者絕少。以余所聞。太君之行誼。可不謂賢哉。昔太翁在時。以俠義見稱於世。家往往致千里客。客無貴賤。莫不人人自以爲與翁歡。以此聲施赫然。雖公卿戚里間。皆樂與翁遊。彷彿季布鄭當時之風烈矣。及予與賢阮仙卿兄交也。典型猶可想見。而仲兄仙芝。能世其家。故予三人相得。若骨肉然。嘗私自念。末世交多市道。形勢之與矜。而安樂之相比。窮達變而意氣衰矣。何李氏之門。皆古處也。及與仙卿兄燕語及家事。然後嘆太君之賢爲不可及。而益徵內助之不可少也。太君名家子。雖婉順協於內。則而卓然有烈丈夫風。好義樂與。每先太翁意。賓客滿座。則自視具酒醴盤榻。無不豐旨。日無倦色。而親戚交遊之急乏者。嘗問遺其家。及乎老矣。時時爲子姪諸婦。言太翁生平事。其語皆有合於雞鳴雜珮之指。太君非能知書。蓋性而有之也。子嘗以事走京師。至仙卿之家。至則如歸。其兒童皆喜客至。僕役謹執其事。井井咸有法度。蓋非一朝一夕之故。其馴服於太君之家法者。深且久矣。故兩賢阮聲名日以著。而家孫雖少。綽有祖風。行爲世顯人。以發揚潛德。不幸而太君歿矣。予忝以通家之好。知太君懿行頗悉。而恨文采不彰。言不見重於世也。然親知之中。必有能闡述之者。將爲采風者所錄。光諸簡策。與山妻陶母並傳不朽。太君何憾焉。今聞歸兆有期。謹述所聞。以申哀誄。靈其鑒之。尙饗。

昔聞牛君次經。稱西屏先生之賢。既讀其所爲族譜。敍知先生能養節母志。撫諸弟成立。慨然想見其爲人。次子儀。客於津。登先生之堂。而與長君伯倪爲一人交。歸述先生父子間事。乃知慈孝萃於一門。方是時。太君之所以操內政而嗣徽音者。亦已聞其詳矣。泊先生沒。覽伯倪之狀而哭之。恨未得一見。思見伯倪焉。歲在庚寅。歸我先考妣於兆。伯倪攜弟執菴來會葬。事竣乃見。見卽別去。恩恩數語。未盡所懷。然儀之客於津者。十有餘年。家貧親老。累重途窮。唯伯倪實先後馮翼之俾。予兩老人不失菽水之養。於昆弟無煩言。卽諸孫婚嫁。次弟以舉。傳稱以友輔仁。予於伯倪見之矣。孝子不匱。永錫爾類。誠乎已而順乎親。以其餘施及朋友。伯倪之於儀。可以徵之矣。然則體先公之心。而養太君之志者。豈顧問哉。含飴弄孫。遐不屑壽。而忽然沒也。儀曰。伯倪不勝公私之逋。委積爲裝。將入都而營之。太君遽病。不果行。猝至大故。而拮据卒瘞。不以貧故儉於禮。蓋已瘳矣。予聞而嘆且愧焉。方我先人之未葬也。伯倪聞而憂之。及其葬也。發策倡議。實自伯倪。而所以經畫裨造之者。不遺餘力。義舉四喪。惠存三世。中心藏之久矣。今伯倪猝然遭此。知盡能索。而予父子徒爲之蒿目。無分毫可以與力。人各有心。何能自遣哉。聞太君葬有日矣。生平嫩行。津士大夫皆能言之。故不復云。第言其心之不能自遣者而已。掇蘋醢酒。惟其鑒之。

鄧西屏誄詞

公清族也。遠祖仕元。以文詞顯。爲儒學提舉。明成化中有第進士爲良二千石者。其間名爵纍纍。昔公嘗續其譜系。聞予好古文詞。以書幣抵文安。屬爲之序。辛巳冬。予遊天津。乃識公。敦直人也。對客不作寒溫。

往復其面如其心。自予來寓津。與伯子游。嘗過其家。公必出具賓主語。竟日皆質直醇樸。聞之令人厚。每謂予曰。生好共雅人談。覺其詞致聲聲可念。余雖不足言雅。然公之風期可知矣。末世貴假惡真。賤才矜勢。持衡挾纊。量而後交。見卓犖則低眉。對淵雲而抗顏。俛仰爭於錙銖。水火變於俄頃。公獨非俗中人耶。何趨操之殊也。且夫窮達有數。榮悴不常。八姓十六族之裔。豈必皆今之矜榮者。或一旦純穀被體。頓忘生平。舌話鼻語。慷慨氣逸。步法制而不謀。若生未嘗自貧賤中來者。獨不知樊絳侯時。有是態否。公每爲予言。而鄙且嗤之。故累致千金而不居。沒無長物而不悔。任其坦達。其有由來矣。伯子器沈機敏。予與交而重之。又高公之義。旣悲其沒。而力不能具饌物。獨念曩昔屬序之意。喜予文詞。故爲文以誄之。曰。元於漢。易之師。延其學。世紹之。喬之松。直孫枝。雖不試。璞在茲。端兮厚。樸兮茂。祗以異。不以富。

陳學士文集卷十四

墓誌銘

鎮綏將軍襄勇潘公墓誌銘代太倉王相國

康熙五十有八載五月二十八日鎮綏將軍提督陝西軍務潘公卒於位上聞之震悼詔贈太子少保賜祭葬諡曰襄勇其孤翰林院檢討祥等將奉公柩葬於某阡既載王言於豐碑昭殊寵又狀公行治屬予誌而銘之予維國家以神武定區寓而智謀雄勇非常之人生其間相與翊締造宏式廓勳名卓鑠於開國之際既章章矣我皇上撫有不基天錫智勇內平三孽威加朔漠一時禦侮敵愾之臣奮忠殫力各奏膚功不可勝數而秦隴河湟間名將若張靖逆之略王奮威之勇皆表表人耳目維公兼之而訐謔遠猶尤非武臣所敢望此天所篤生作聖天子股肱心膂其生平將略暨行事之實予樂得而論次之其可以辭按狀公之初起從軍也蓋年十七八距其卒計在戎行勞王事者六十年所歷官由劄付遊擊疊受參將旋以副將管遊擊事越授肅州副將即充本鎮總兵官調天津總兵陞固原提督特授鎮綏將軍階光祿大夫爵世襲拖沙喇哈番公在軍中以力戰爲名初隸陝督標下從中軍副將張自臣戰竹山房縣賊於橫水溝斬獲獨多從攻僞軍門白巖寨先登破之從提督李某討茅麓山賊李來亨拔其寨捕鹵二十餘人斬級過半平之吳逆之亂王輔臣等殺經略以叛陷臨鞏秦蘭全陝俱震公從揚威大將軍阿公討

之破賊於三水淳化復涇州斬賊帥周養民略駝駝等拔其寨多羅貝勒定西將軍別遣公攻賊北面斬級七捕酋十八人別將數十人致定西之命於甯夏遇賊將令溝轉戰七晝夜卒得報以歸別將援山陽大戰援回全軍從撫遠大將軍圖海公進討王輔臣逼營賊寨下日夜撓之遂絕其甬道從偏副將守舊縣關勦牛頭山剋下小嶺斬僞都司一人千總二人賊首千餘級從征興安嶺先鋒頭敵破兩河關連斬僞遊擊守備各一人千總二人僞將軍譚宏等據川東從總督哈公討之別擊斬鼇山賊千餘級大竹賊二千級皆復其城戰羅石橋靈鷲寨各斬級二千擊破賊月城寨蹙之於渠縣共斬首二千八百餘級前後所經凡數十百戰常爲軍鋒故揚威定西撫遠三將軍復臨鞏定平涼撫興安礮兩川所嚮克捷以公數以少收衆也當是時公名震秦蜀一時稱驍將者首推公然公實多大略料敵制勝決機俄頃其御衆嚴而有恩能得人死力非徒恃其勇而已兩河關之捷僞總兵王緒武猶負固興安公因進說大將軍曰兵貴神速宜直前逼之可立下不者敗賊竄聚將不可復制撫遠遣公往撫緒武果降而興安屬城皆定公之將略於此已見一斑矣及鎮肅州時噶爾旦聲言犯哈密昭武將軍郎公以禁旅遏之公逆料其詐密選銳馳二千里獲狗夷訊之賊果東去王師遂還省諸路待儲以億萬計又遣驍弁武元濟偵賊於坤都魯果遇其哨騎都刺等盡殲之賊益怖不敢西而訛言賊往襲藏上命公駐防三岔河公執訊得賊情知終無西意遂振旅而還公之長於料敵多此類噶爾旦之敗於昭磨多也公力戰之功爲多時公領中軍指揮督戰飛礮貫頤出耳後公奮不顧大呼持矛直入左右軍乘之皆殊死戰賊不能支遂大敗論者

皆以公神勇不惜死爲不可及。然兵家之要。貴出奇扼險。方戰時。彼衆我寡。公曰。先據山者勝。遂引兵趨據山巔。率衆馳下。遂以破賊。善乎振武將軍之論曰。向非登山據險。勢若建瓴。必不能破敵。若是之速也。可謂知言矣。而予之意。則以爲公之制勝。早決於併糧減卒時。方大軍初出塞。數萬衆晝夜冒行。空磧中。不知賊在所。而輓運者又苦沙擁不得前。夫一日不再食。則飢。再日不食。必譁且斃。未見敵而我師已重困矣。公撫劍語諸將。速併糧。簡留精銳。餘悉給食遣還。若減兵獲咎者。請身任之。諸將從其計。公卽下令。軍中士卒。人人自奮。矢必死。無一還心。是役也。微公之謀。兵疲食盡。勝敗未可量也。方今小醜陸梁。擾我外藩。天子赫然。命六師征之。往往以餽餽之勞。上煩宵旰。使公得效其壯猷。出奇候間。必能以少擊衆。樹乃丕績。而惜乎年已老。上愛而惜之。不使復臨行陣。三請不獲命。日邑邑憤懣。遂發疾以卒。嗚呼。其可悲也已。公所蒞大鎮三。皆天下重兵險要繁劇處也。肅州固原天津。公至輒申明約束。嚴陣勒兵。常若大敵在前。甲器旌旗壁壘。悉更其舊。而賞信罰必。士氣日斂以厲。以故天津固原之兵。皆蒙聖天子校閱。技精卒銳。賞賚有加焉。及巡視營陣。森如細柳臨淮。喜動天顏。頒其營圖。爲諸鎮式。而肅州夷落。憚公威名。至呼爲哈喇巴圖兒。以止兒啼。迄今去塞數百里。牧馬絕踪。民安耕作者。皆公之遺也。公尤嚴於治盜。上嘗語近臣曰。天津自用潘某。盜息民安。付託可謂得人矣。及鎮固原。悉以效於津鎮者行之。明告誡。飭汛防嚴緝捕。定賞格。重處分。而其尤得者。舉壯勇矯健之徒。盡羅而致之幕下。旣絕渠魁。又以收其材用。此蘇子瞻徐州上書所謂開豪傑仕進之門。而奸猾之黨。可得而籠取者也。思深慮遠。豈區區一將之智而

已哉。公在肅州。修築邊牆一百八十里。汛兵免巡哨之勞。商旅無抄掠之恐。至今便之。鎮固原時。疏請安插卦子陳四等餘黨。給田墾荒。俾爲良民。官民俱無擾。而遂以消地方隱然之憂。是皆應法可書。而其最不可及者。在密請建儲一疏。舉朝所不敢言。公以事關國本。身爲老臣。忠悃所積。發於不自已。又安計職之所不當言。言之而獲譴也。古所稱社稷臣。庶幾近之。賴天子神聖。鑒其忠誠。所以寵眷優渥之者。有加無已。蠲書勞勉。天語褒稱。御服尙食。下及便蕃之錫。難以悉數。人以爲彤弓之貺。朝廷所以旌有功。而不知公之深結主知。精誠貫達。固有出乎積功累伐之外者矣。予特表而出之。以見盛世君臣相與之際。爲近代所不及。宜垂爲世法。至若其他建置。與夫推轂將士。尊禮士大夫。具詳狀中者。皆不復道也。公諱育龍。字飛天。號見溪。其先固原人。曾祖文秀。始遷居靖遠衛。生汝林。汝林生澤溥。俱以公貴。贈光祿大夫。鎮綏將軍。曾祖妣郭氏。祖妣張氏。妣閭氏。俱贈一品太夫人。公以崇禎壬午生。卒於康熙己亥。得年七十有八。元配蒙氏。誥封一品夫人。子男六人。長廣東右翼鎮遊擊福先。公卒。次翰林院檢討祥。次甲午舉人祺。次恩廕生候補六品京職禱。次辛卯舉人祚。次辛卯舉人禕。女一人。未字。孫二人。福出者一曰紹周。世襲拖沙喇哈番。禱出者一曰紹武。女孫四人。俱幼。自公之鎮固原也。邊鄙無事。公日製鎗礮。具軍裝。所得俸賜。盡以蕃息駝馬。駝馬動以千計。諸鎮聞之皆笑。謂承平日久。何事張皇爲。迄今澤旺跳梁。諸大臣調撥兵馬。諸路倉皇。獨固原皆所素辦。卽日就道。不稍需。若逆知而早爲之所者。及大將軍十四親王西征。奏奉牲畜器具。所未受者。遺令仍進之於朝。嗚呼。老將知兵。大臣謀國。防之豫而算之長。大抵如此。庸人不

知則以爲多事。因循苟且。日就廢弛。一旦有急。卽茫然無所措。自古邊防之壞。未有不由於此者。夫乃愈歎公之不可及也。已銘曰。

於桓潘公。伊濯其烈。摧鋒陷堅。霆擊電掣。樹百戰勳。領三鎮節。威尊山峙。令行霜冽。方夏甯謐。帝治修文。公承雅化。造士興賓。旣作泮宮。言採其芹。載色載笑。昭昭德音。丕顯潘公。允文允武。維時元老。方叔吉甫。二華比鎮。翼我西土。月氏啟狡。螳臂旅拒。公請犂庭。闕如虓虎。帝念黃髮。則不我許。夜視旄頭。如震如怒。志不獲從。懷憤以歿。誓作天弧。操矢西發。毅魄爲星。名山歸骨。生死哀榮。垂光阡陌。

贈翰林院編修晚茲張公暨配王氏孺人墓誌銘

新安縣有合葬三台之原者。爲甲子武舉人考授守備贈翰林院編修張公之墓。公之卒。以康熙己丑正月。得年五十有四。遺令屬其子鱗甲曰。我未克葬我父母。其勿以我歸土。勿爲我誌狀。以增我愧。故公之葬。以庚寅九月。卹其考妣於先塋。未銘也。越十二年壬寅。子鱗甲官編修。逢覃恩。以己官贈公。而封母王夫人爲太孺人。明年雍正元年。太孺人以二月丁巳卒。得年六十有七。越九月壬寅。合葬於公之兆。前期乃以狀來。屬其同年生儀曰。吾父歿而墓石未誌。痛於心者十有四年。今又喪吾母。葬有日矣。唯吾子哀而誌之。不唯其名。唯其實。宜莫如吾子之習也。予不得辭。按狀。張氏之先。世爲小興州人。明永樂間。徙居新安。至還醇公。諱純儒。司臨城鐸。崇禎戊寅兵變。以死殉其城。事載畿輔人物誌甚烈。卽公之祖也。父藻洲公。諱所養。以積學高行。飲酒於鄉。配陳夫人而生公。及弟泗英。公諱夢蘭。字石公。號晚茲。泗英出爲伯。

父後。公友愛最篤。視弟如形影。相倚如左右手。公意所向。弟奉之唯謹。然公每事體弟意。卽所不欲。則先發之。使若自己出。而王夫人亦能助成公志。娣姒烝烝。兄弟若也。甘苦勞逸。相推爲先。終無一言之間。以故蘓洲公夫婦。訢然享菽水之奉。不知有貧。而閭巷間長老。誡其子孫。以張氏兄弟爲法。有谿勃而鬪於牆者。聞公來。輒走匿。恥公之知。若撻於市云。公爲人退讓。恂恂似不能言。然邑中有大利害。若是非關名教者。則侃侃正言。無所避。以此鄉人皆愛而畏之。遇乞人輟隸。無倨色。見豪貴人。雖長吏。意氣自若。長吏之賢者。皆重公。公益自引退。未嘗以非公至也。里中事有不平。多就公取決。公一言輒立解。至於訟庭者。鮮矣。同巷居人數十家。竟公之世。門無胥役呼喚聲。無少長。無一人撻鞭扑者。公卒之日。哭之如哀私親。新安澤國也。湖溼縣互數百里。葭葦中港汊縱橫。羣不逞之徒。往往劫掠行舟。聚散出沒。吏莫能迹。公廉得主名。則棹小舟遲暮至。直造其豪曰。張某來投宿。豪驚曰。公乃肯顧我。卽置酒。公素善飲。觥至輒浮。白笑語酬酢。如平生歡。豪大喜。呼其曹畢至。各通姓名。公人人撫接。則盡喜。爭勸公飲。公呼巨觥。滿引數十。其曹皆醉甚歡。遂各自言平日所爲。不復隱公矣。達旦。公別去。已而復至。其曹益暱。就公酒酣。公從容言曰。君等皆豪士。何故草間作諸非法。甯有令終者耶。我前日來。乃知君等所爲。相勸改行。非借宿也。無謂人不知。一旦官吏以名來捕。身命立盡。爲鄉黨笑。且水鄉生理甚饒。魚蝦菱芡。取之不竭。甯須害人求活耶。衆皆感動泣下。誓爲良民。自是估帆往來無戒者。公之力也。公未嘗言於人。久而其徒自言之。歲在戊寅。聖祖幸新安。視河防。發內府金。命督理河道王公新命修之。王公咨士大夫以方略。公圖上源委及

險要修築之法。王公大喜。卽委公兄弟董其役。不兩月而工竣。支發公費。纖細無不當。王公欲以名上聞。公力辭乃止。嘗謂人曰。聖天子幸哀吾邑而捍之患。吾儕卽畚鍤從事。凡以自利耳。小有規畫。而妄覲上賞。貪天功者不祥。吾弗敢也。然公所修。迄今二十餘年。無衝決之患。邑人賴之。公才足以幹濟。而不矜其能。善足以服人。而羞伐其德。傳所謂躬行君子。庶幾近之矣。配王夫人。同里文學與魁之子。朔州刺史夢庚之孫也。歸公時年十六。門業蕭然。無中人之產。夫人以婉婉得君姑歡。以溫惠淑慎。遂公兄弟之好。以勤苦節蓄佐家乏。以通敏廣達寬公之憂。而明其淡泊。以誠信襄公父母之喪。公之既沒。以堅忍強力率其孤。葬其君姑及夫以禮。以暇勉有無。迎公之叔於千里外。養終於家。而愛白氏姑。周給之如先姑在時。以力學勸其子鱗甲成進士。官禁林。鳳翼登賢書。鳳翽攀鱗皆補博士弟子員。鳳翰入成均。而身享養祿。卒邀貤封。以贈官榮公於身後。嗚呼。可不謂賢哉。予與鱗甲齊年相友善。見其昆從友愛。知其所從來遠矣。歲時拜母堂上。脩然如林下人。間所以誡其子者。以謹言慎行。知足安貧爲訓。宜夫諸子咸自修飭。有以繼先公之緒也。孫七人。鱗甲出者燭。鳳翰出者炳。煜煜焜焜後鳳翼。鳳翽出者焯。灼灼女孫六人。銘曰。無位而威。畏是正直。化莠爲良。薰於銘德。德非外曜。爲政於家。其道具邇。其施則遐。室有調瑟。家無反弓。王道易易。起化閭中。同心比德。貽爾孫子。生死哀榮。旣多受祉。

封國子監助教河南上蔡縣知縣蒼漪趙先生墓誌銘代郝少司空

君諱玫字文玉號蒼漪司寇公第三子也司寇公善先中丞居行同軌白首如昆弟歡予與君以通家子

各往來拜大人於堂上。退則攜手肩隨。言笑累日夜無厭。及仕宦間阻。猶時時夢至其處。與君嬉遊。如童少時。今歲六月。君凶問至。知以五月晦日卒。哭之。閱兩月。而君之孤國子監助教續美走京師。告葬期。且狀君而泣請銘。夫知君莫如予。予不得以不文辭。按狀。趙氏世居山右。其徙家滿城。在明永樂間。君高祖貴。有至行。七飲酒於鄉。曾祖公道。祖國棟。俱以司寇公貴。累贈通議大夫。君早慧。年十五。補博士弟子。試異等食餼。以明經教諭慶雲。擢河南上蔡令。攝西平確山兩縣令。以子續美遇覃恩。封文林郎。年六十六。卒於家。慶雲。瀕海瘠邑也。士不知學。廟庭就廢。兩廡無木主。釋奠缺俎豆。君修而具之。月集課諸生其中。供飲噉甚豐。饗序之間。始彬彬矣。有宗生不自檢。爲鄉人所發。君切責而以誠感之。立悔悟。卒爲善士。洎君以母憂去職。生牽衣拜且泣曰。眞吾師也。送者皆爲之色動。知上蔡縣。多惠政。縣素有河患。隄潰則責之民。晝夜荷鍤。不問其飢飽。民以爲病。君出倉中餘穀。分給當役者。然後督之工。皆踊躍從事。故百里之隄。不一月而竣。已乃行田間。見溝渠形。縱橫隱現。問之蔡人。相傳自召杜以來有之。久而堙矣。君乃因其故道疏濬之。歲加深闊。由是得灌溉之利。水不爲災。而年穀倍登。催科不假手胥吏。時其緩急而爲之期。先輸者簪花。送以鼓吹。其不及者。再三期。不得已而後刑。刑示辱而已。故民爭相勸恐。後遂無一戶欠者。撫軍奏紀錄七。漕使奏紀錄四。鄰邑鞭扑無虛日。而以及額受罰者相望也。蔡境與鄆城西平遂平爲界。三縣水豪民。蔣如江。郭大士等。謀決隄以壑蔡。蔡人惶急。集衆持兵。將與之決死鬪。君馳至隄所。諭解散之。牒陳利害。撫軍委員勘詳。嚴飭三邑。而蔡以安。修上蔡書院。增置義田至三千畝。延宿儒王渭主之。

邑人爭遣子弟就學。君親課之如慶雲時。而授餐之豐有加焉。當是時。上蔡人文甲中州。四方負笈者踵至。不遠千里。學使陳某語人曰。義學之設。徒長吏爲名高耳。如趙上蔡。可謂質有其文者矣。蔡、吳、楚之衝也。君橋其道若干所。列樹鑿井。以便塗旅。往來者入境。如行畫圖中。至今賴之。刻石表縣治。揭雜派私徵。諸不便於民。所宜永革者若干事。將以明民而忱不肖者。不得復取其爲。蔡人久遠計。多類此。君雖平恕愛人。而持法嚴。遇猾惡無所舍。嘗曰。法度不具。民不知方。稂莠不除。嘉禾不殖也。以什伍法編人戶。百里之內。比閭聚族。如在掌上。故奸民無所容。吏無所售其欺。除窩盜之武生張宏略。法按搶民婦之監生呂調韶。而境內肅然。治化大行。其攝西平。一倣上蔡之治。攝碓山時。車駕方幸楚。千乘萬騎之所經也。頓供繁且棘。君應之秩然。上官賴以無隕越。故在確頗久。多所興除。去之日。民泣涕如失父母。大抵君之居官也。廉而勤。寬而有威。所至爲民規利。不屑屑目前聲譽。故久而人思之不衰。惜未究其所蓄。而材不大用於世也。今上方加意親民之吏。待以不次之賞。守令受知。擢爲方伯連帥衆矣。君故大子方銓曹引見時。曾垂顧問。倘知其卓卓如此。寵遇之隆。豈可量哉。以君之循良。當聖天子側席旁求之日。而官不過縣令。年未及而就閒。士之所遇。有幸不幸。豈非命歟。君少而恭謹。遇人恂恂然。方司寇公時。門業鼎盛。而清約沖夷。見者不知爲貴公子也。伯兄乘光久病不接人。仲兄淑一早世。門族梓里酬酢。皆君一人。無不厭人意。司寇公在朝。太夫人家居。往來定省。無毫髮失缺。皆予所深知而親見者。罷官之後。盤桓松菊。泊然有以自樂。絕口不談世事。然急人之乏。有不能婚葬者。必周之。無間族里也。屬纊之際。索筆書不愧不作。

四字以貽厥嗣。嗚呼。君之生平。可謂允蹈之矣。配王孺人。慶都舉人。固安縣教諭諱祚明女。子四。續美、廩貢生。國子監助教。濟美、廩貢生。候補八旗教習。鴻熙、鴻業。皆諸生。女二。俱適世族。孫二。重輝、重閔。濟美出女孫三。續美出其姻戚名氏爵里。狀所詳者。皆不復及也。某月某日。葬於某鄉之某原。銘曰。

爲師則良。司牧則愛。瑞果慶雲。賢真上蔡。士民秉德。斯戴斯佩。愧怍兩亡。天人可對。歸全茲邱。永終無悔。

封汝甯府知府沛然龍君墓誌銘

龍君沛然。諱霖。詩人東漢震之兄。而汝甯太守圖躍之父也。自其曾祖住。自遼南遷。逮其父贈儒林公起潛。爲天津人三世矣。家之興也。自儒林始。君繼起。以才氣雄流輩。所摧蹈無險難。赴士之急。里中諸俠咸歸之。其業益大。賢大夫洩茲土者。多君能服衆。奉約束。皆引重君。君好客。多貴游。勳衛子侯。往來津門者。爭詣君。相與結歡而去。以此名聞釐下。震君異母弟也。儒林公易簀時。指以屬君。君事繼母如母。繼母病篤。震遠出未還。君曰。母思弟耶。母曰。汝孝養如是。思渠何爲。泊沒。累數千金治喪。予嘗客寓天津。與震爲文字交。震工詩。爲人擺脫閒放。自遠於聲利之外。君之門車馬雜還。座客恆滿。震睥睨不屑。酒酣一往。時出語驚其座人。難以譴浪。客不能堪。多引去。君追謝之曰。吾癡弟也。幸無介意。然未嘗一語傷弟意。一切順適之。震好酒及游。出足舟車。居足醇醪。皆君陰戒子若孫祗奉之。震得恣與所極。不問其費。子若孫亦嚴憚震。過於君。惴惴恐失其歡。嗚呼。凡今之人。莫如兄弟。而士大夫家。不相能者。往往而有。方其競長短於錙銖。暴是非於行路。語言之忿。慘若干戈。妻孥之讒。疎成秦越。常棣之情。旣薄。蓼莪之義必衰。乃至娣

奴戟手。猶子反唇。本撥枝傷。家風隕墜。聞君之風。亦可以慙然滋愧矣。君祖父皆未仕。子圖躍起家參軍。歷州牧。內遷部郎。出典大郡。所至以廉能稱。蓋義方之力爲多。方圖躍之筮仕也。君戒之曰。吾家幸不苦貧。汝第勉爲清白吏。吾不惜破家佐汝。若持官中一物遺我者。吾不能復見汝矣。刺高唐時。卽遣其叔父震臨視之。泊守汝甯。君年已七十有九。自往觀政。時豫省有民變。實郡縣吏以橫斂激成之。詔大司寇韓城張公往按。皆抵法。獨汝甯超然吏議之外。人以爲賢。初大府議派時。列郡俯首唯命。或且因以爲利。圖躍投領狀藩庫。不派民一錢。已乃以家財補之。君之教也。士民感頌。適屆君八旬。登堂稱觥者。日數百人。浹旬不絕。君怡然曰。吾可以無憂矣。遂命駕歸。歸三日而考終焉。實康熙戊戌閏八月廿九日也。以圖躍貴。詔封中憲大夫河南汝甯府知府。配駱氏。陳氏。俱恭人。子二。圖躍其長也。次一躍。出後震。女五。皆適仕族。孫四。圖躍出者三。符。簡。策。一躍出者一。節。孫女二。圖躍出。曾孫中辰。符出。敏。簡出。君爲人。隋直。不能容物。有不可其意。立形聲色。曹伍中多下之。予客津門十餘載。不交游。程卓輩每憚爲難近。惟與東溟震往來無間。第時時過飲其別墅。所謂老夫村者。未嘗輒至君家。君不以爲嫌。每遇。必就予飲。以二十盞爲限。輒辭去。曰。吾不欲久瀕子也。其款曲乃如此。君卒之三月。東溟震狀君之行來乞銘甚切。以未有葬日。許之。而不果銘。今圖躍將以辛丑五月某日葬。君祖塋之次。復申前請。而予方憊然在疚。不親楮墨者。一期於茲矣。再辭不獲已。撫東溟之狀而銘之曰。

弟無適俗之韻。惟君遂其高。子有素絲之譽。惟君厲其操。可謂友于而明大義矣。履險如夸。卒以受貤封。

登上壽。豈倖邀也哉。

候補按察司副使安陸府知府易軒楊公暨配孫宜人墓誌銘

君諱綠綬。字公垂。號易軒。世爲直隸長垣著姓。以刑科都給事中諱文昌者爲曾祖。以歲進士諱玘者爲祖。而贈奉政大夫諱睨之長子也。年六十九。以康熙癸巳六月棄世。階至中憲大夫。官終於湖廣安陸府知府。而所歷者。山東定陶縣知縣。刑部山西清吏司主事。本司員外郎。本部四川河南兩司員外郎。戶部雲南清吏司郎中。凡仕二十一年。其行事可紀者衆矣。在定陶建唐文書院。進髦士其中。給養而親教之。癸酉丙子。連科雋三人。蘇銘。田雲翼。蘇璜。皆相繼成進士。自是甲乙榜不絕人。前此四十餘年所未有也。邑有濟甯張秋挑河夫。歲僉富民四五十人充之。家無不立破者。君乃通計歲需夫若干。應工食銀若干。均令合邑田一畝。出制錢一文半。鄉約放存。官爲僱夫。以除偏累。通詳上官報可。并下其法。濟甯東三郡。倣而行之。勒諸石。除苛稅入官者。歲三百金。民以益蘇。乙亥。北征噶爾丹。徵軍需車輛。羽檄下督州縣各。惶擾失措。君已先事預辦。至則立付事集。而民不知。是歲以政最欽。取赴部。士民送者塞途。中丞桑公歎曰。部得一賢曹。我屬失一良吏矣。在刑部號爲廉平。閱招案可生者。力言於堂。率從末減。大司寇王公雅重之一日。上下秋審疏。以應決人數過多。俾詳酌所當矜疑原緩者以報。王公顧語吏。速請山西司楊員外來。來則迎謂之曰。此君之心也。得釋之人。泣拜於門者相踵。歷刑部三司。所全活數十百人。戶部雲南司。漕務所隸也。君爲郎中三年。陋規屏不入。已嚴束諸吏。需索爲之稍息。會假監獄起。株連蔓引者無數。

官吏方借以邀厚利。大司農徐公知君廉平，屬治之。君盡釋諸連引者不問，止治包攬作姦之人。寘之法。徐公喜曰：我固知楊郎中能辦此。安陸之政，一如定陶。建陽春書院聚課七邑士，俗故健訟。君至期年，訟益衰。沔陽有大戶兄弟爭產，而訟之撫軍者。事下君，各以多金賂，嚴拒之。而諭以至情，兄弟皆感泣請罷。景陵民劉道遠，姪婦自盡，而令疑其奸，擬重辟。君訊得其情，反縣案上之。令以故人人罪應劾。君爲之請，乃免。人益多君長者。君爲政持大體，不苛，而多計略。能間發奇中，故前後所治，民無遁情。聞流言有盜欲乘元夜，窺郡城某富人家，即令僕役更番出城，分合隱顯。若有所捕狀，同官竊笑之。竟於城下土中，搜得鎗刀礮銃等物，擒賊數人。已而湖南獲劫賊，自供原欲焚掠安陸某家，以有備未敢發。人始驚服。在郡四年，以病請休。七屬民赴省留者數千人，制撫兩院徇民心不聽去。更以署荆南道篆。君雖勉視事，而歸思嘗鬱鬱。神益悴，會有新例，捐陞者許離任候補。子越梓遂傾家所有，捐陞按察使司副使，乃得去。歸甫五月而卒。人皆惜君之未究其用也。元配孫氏，同邑諸生祚長女，貞靜有識，以勤儉佐君爲廉吏。嘗從容語曰：居官苟爲子孫計，莫若寬刑薄賦，積陰德以遺之。若貪財害民，以多金爲燕貽，適以害其子孫耳。又助君振施，推遺產盡與弟紫綬，而養族節母夏氏、程氏、苗氏，弟婦李氏於家。宗支持以舉火者，餘二十人。戚黨婚喪之乏絕，無不周給。中外翕然稱賢。先君一年，以康熙壬辰七月卒，年六十七。誥封宜人。子越梓將以乙未某月日，合葬於先人之兆，而以其狀來請銘。余與君壬戌同年友也，知君爲稔，故次其行事之大者，其餘悉見於狀，皆不復詳也。君一子而賢，即越梓。戊子舉於鄉。女三：孫男二，鍾恆、鍾衡；孫女二，嫁娶聘。

字皆仕族銘曰。

死而乃銘君則未。碑在人口有生氣。宜人聿來固甚慰。嗚呼。松楸之表頤且髡。風乘雲旗見髣髴。

曹熊占墓誌銘

曹君諱清。字熊占。直隸景州人。有學能文。未仕而卒。卒之日。士累欵。大夫嗟。巷哭。鄉人走相唁。以悲。皆曰。疇若曹君。以孝友率先。吾子弟無敢違其親。而與長者齒。疇若曹君。子其弟之諸孤。而愧夫慈子嗜利者。俾不敢以面目向人也。曹君沒。疇能收恤族黨。而與之共有無。疇以一言釋鄉人之紛糾。俾迹不涉於訟庭也。持世之大柄。曰賞曰刑。用以長善遏惡。然而善有不給。賞惡有不及。刑。刑賞之所弗能加也。勸懲之道。於是乎窮。匹夫爲善於家。非有賞刑人之柄。而嚮慕之者。往往相觀以化。而不自知。其有不善。唯恐見之。感發在性情之際。而興起乎倫理之間。所以潛移默化。佐刑賞之不逮。今曹君之行。其感人若此。雖曰獨善。所施不已偉哉。安在無位不章。而聽其泯沒也。予故因其孤之請。而爲之銘。按狀。君父曰懋爵。懋爵父曰文炳。文炳父曰四科。皆庠生。四科父曰萊陽令子儀。子儀父曰商城丞元吉。元吉父曰贈光祿大夫太子太保戶部尙書璋。自光祿至君凡六世。君兄弟四人。次第一。娶李氏。克諧以孝。事父母。晨昏食具。如古內則儀。人共訝之。已而嘆曰。爲人子當如是也。孺愛諸弟。煦煦若恐傷之。諸弟益畏謹。聽從其言。有牆而闕者。聞曹君來。輒噤咋解去。侍親疾。廢寢飮。泊沒。絕數日粒。幾死。喪三年。未嘗御酒肉。凶服者至不敢對君笑言。君家饒。昆弟分業。各累千金。直仲弟瀆無子。次當君子嗣。嗣則受其業。察瀆意愛弟。激幼子朝。

柱常撫抱之。卽立議以朝柱嗣。其善體諸弟意。而推讓於無形。皆此類也。諸弟淪喪。撫諸姪過其子。卒底於成。收恤族人之孤獨。而周給其婚喪。鄉鄰之無告者與焉。嘗焚數千金之券。鄉人德而媿之。以故事有不決。咸來質成。曹君之所可。衆爭直之所否。則若撻於市。過君之居者。視若鄭公鄉。王彥方里也。閭門肅睦。對妻子如嚴賓。李安人婦德修。諸子俱恂恂與人厚。此皆鄉人士大夫嘗所稱道。不獨其孤之狀爲然也。君以某年某月日。葬於某阡。銘曰。

渾然端且厚。不言而能與人以無咎。乃知士苟誠於爲善。雖匹夫獨行。其及於物也。與有操柄者。吾不知其孰先後。嗚呼曹君。亦足以不朽矣。

甯母路安人墓誌銘

安人性路氏。廣平永年人。父諱雲鶴。性方嚴。學有經法。爲諸生祭酒。無子。獨一女。教之如子。亦方嚴。有父風。年十六。歸侍御甯公元著。初封孺人。再封安人。以康熙辛丑歲卒。年八十有四。距侍御之歿。二十五年。又二年。雍正癸卯。乃克祔葬。安人沈嘿寡言笑。明於大義。平生所遭。炎寂險夸。人生之變略備。而不以動於心。所謂宇泰定有道者非耶。方歸甯值家乏。勤苦操作。奉君姑甘旨。佐侍御公成其學。夙興夜寐。靡有朝矣。澹乎有若將終焉之志。及侍御成進士。擢詞館。授臺班。視兩淮。巡西南二城。彈劾不避貴近。疏數十上。多報可。當是時。侍御直聲動天下。安人心獨憂之。然無一言間執曰。御史職固應爾。已而果以言事落職。安人欣言趨駕。偕出國門。抵家。謂所親曰。剛必折。廉必挫。賴聖明矜全。賜骸骨歸鄉里。幸矣。初安人

無子。代侍御置筵。生子三人。愛之如己出。至是。委家樣貳室。屏居一椽。焚香晏坐。絕甘鮮。卻珍麗。布素三十年。歲丁丑。天子思敢言之臣。侍御以原官徵。時年已六十餘矣。親故皆喜。州府爭爲之勸駕。安人力止之曰。君性狷急。言多激烈。感慨今老矣。追陪新進。猶持三十年前風規。其誰能堪之。田園足沒餘齒。必辭病勿行。且實病。非欺也。侍御顧念上遇我厚。嘗全臣於孤危中。未有以報稱者。今又起我於廢棄之餘。雖老病。願一望見闕廷。死職下無恨。遂就徵到官。卽抗疏劾諸當路。甫上而疾篤。所劾者抵隙訐奏。俱下吏議。侍御已卒。不能白。竟論徙家屬遼左。安人聞變。夷然攜子婦就道。曰。吾固知其必有是也。居謫所三載。無戚容。已而以贖歸。門徑荒落。藜藿塞日。親戚咸來問訊。有泣下者。安人道問闕外。敘述塞外風景而已。無一語及前事。汎治舊所居室。墼砌間蒔藝果蔬。花時坐對移日。果熟呼諸孫啖之。手翦蔬。問遺長老。以此自娛。入其室。几席無纖塵。一器位置。必有常處。輒數年不移易。而拂拭如新。每黎明而起。嚴盥櫛衣。雖重浣。無膩垢。蓋潔清凝重。其天性也。予同年生冀君耐菴。兩女弟皆婦安人子。知其事最悉。每爲子言如此。嗚呼。士之無特操久矣。平生隱約。則蹙蹙如不終日。小得志。卽侈然不復憶窮乏時。其務得冒進。微特虧廉恥之防。味止足之分而已。雖機阱在前。刑辟在後。悍然不知顧。一旦禍及。則惶怖嘶慄。莫知所爲。其遺羞巾幗者多矣。安人處貧賤而不憂。居富貴而不喜。罹患難而不懼。初終一心。崎嶇一節。於聖賢素位之道。若允蹈之。豈閭閻之賢而已哉。將葬前二月。其子倬。狀安人之行。介耐菴來請銘。予旣夙賢安人。卽以所聞於耐菴者。列次其大。至於宜家教子。婦德之常。具詳狀中者。皆不及也。子三人。倬。俶。側室張氏出。

側室宋氏出。女二人。李璧如、李克鎮。其壻也。長安人出。次側室張氏出。孫十有四人。振鐸、振翮、振基、振業、振德、振紀、振綱、振祀、振塋、振揚、振執、振壘、振玉、振均。孫女六人。曾孫三人。銘曰。

其志潔。其識先。其天定。其神全。其外來而無與乎己者。皆視之若一也。蓋無入而不自得焉。知而未嘗生。未嘗死也。庸詎知百年之幽宮。非平生之一椽。

薛母楊太君墓誌銘

恭簡先生之配楊太君。以乾隆四年正月。考終於滇。其子豐潤。令薛君天培。以四月得請歸養。候代以行。而太君之訃。以五月至。薛君慟幾絕。洎七月。始克狀太君之行。以書來請銘。其辭慘痛悱惻。予不忍以不文辭。按狀。太君之儷於薛也。以父發先公無子。贅恭簡於家。卽以爲子。故恭簡應試。補弟子員。廩於學宮。皆以楊姓。及卒。而門人私謚之。猶曰恭簡楊先生焉。迨子天培貴。受貤封爲文林郎。始復姓薛。是恭簡終身。固以外舅姑爲父母矣。滇俗。後人者。以所生爲私親。婦亦不執婦職。而太君曰。以聲爲子。權耳。婦而不事舅姑。不經孰甚焉。則請於父發先公。發先公識大義。嘗焚千金券。以全貧交。滇人所稱長者也。許之。於是執婦贊。拜於薛氏之堂。時節羞甘珍。上衣履。所以奉舅姑者。與父母無以異。恭簡乃安之。旣而恭簡之祖若父相繼沒。太君力襄恭簡治其喪。與喪其父發先公者均禮。人以爲薛氏有婦也。楊薛本世親。薛母視楊母如妯娌。故以子繼之。至是皆贅。太君請於母。迎姑共居。與恭簡朝夕左右。兩母前。訴訴如也。當是時。恭簡名行已著。四方俊茂之士。聞聲求友者踵接。太君謂恭簡曰。海匯百川。惟善下而能受。君其虛以集。

衆益用廣學殖。無徒爲名高可乎。恭簡自是抑然自下。攬羣言而衷一是。五經諸史。無不該博貫通。遂爲儒宗。從之受經者。至數十百人。得其傳者。猶堪爲專家師。既歿。而門人相與切劘其子。皆彬彬質有其文。其達者已效能當世。卓卓可稱道。固君子之教澤。久而彌顯。亦賢媛之遠識。贊助實多也。恭簡子六人。天墀、天培、繼楊氏、天培等四人。復姓薛。天培成康熙乙未進士。與予同榜。爲人倜儻有氣幹。初宰密雲。以清彊擢刺遵化。移開州。咸有異政。已以遵化時事。呈議去官。雍正十年。彭城李公初制畿輔。通幽舉廢。察其枉。而惜其材。將爲之辯復於朝。予遇之於邸舍。而賀之以酒。天培泫然曰。非罪見去。官去而得歸。以奉吾母。非才見留。身留而不得歸。恐將母終無日矣。因道太君孤嫠艱辛。督課諸子。茹蓼飲冰。有非九熊畫荻之所可盡者。條舉其事。言之嗚咽。予乃知薛君之賢。繫賢母之教也。今讀所爲狀。猶多當年之語所未及詳者。狀言。恭簡既歿。兩母在堂。諸子漸長。以疊遭大故。物業零替。所以上供甘旨。下食孤雛者。皆太君一力支屈。備極勞瘁。天墀等謀徙業貿遷。用紓母憂。太君泣而責之。教督益厲。命諸子自相師友。出則就正於恭簡之門人。爲社會課文。或緇。卽悲泣不食。以是諸子咸發憤力學。有所成就。此天培當日所言及者。至楊母卒後。姑年益耄。傷逝獨處。悽然不樂。有仲子別往灣頭寨。欲就之居。又安婦之養。不能離晷刻。太君順適其意。奉之就叔。而身依以侍。所需魚蔬果餌。命諸子自城中七十里迭送之。更番往來。日以爲常。叔家所具者。燂鷺七箸而已。終姑餘年。營葬畢。然後歸。此尤人情之所難。真能養志者。則天培當年之所未及言也。狀又言。祖塋隙地。爲族人私鬻者。贖而歸之。曰。無俾他族實偏處邱隴。叔將鬻所居。酬其直而

留之曰。先人慮也可輕棄乎。叔姒歿而子遠出。爲經紀其喪。贖族子之質。身於人者。且授室焉。前後所收恤。婚嫁親族無歸于女。凡十餘人。宗族長老嘆曰。微夫人。薛氏其不競矣。數事雖細。皆敦本篤親。維繫人倫之重。而太君以孤孀艱難之際。竭蹶而行之。斯其識遠見大。豈復巾幗中人者。自斯干之詩。言女子無非無儀。惟酒食是議。後世遂以爲婦德之極。則不知此詩作於宣王之世。懲豔妻致亂之害。激而爲此言。非通論也。史傳所載家國艱難。賴賢媛之力。匡救扶持者不少。其人類能察微見遠。迴出於尋常意計之表。蓋皆以識勝也。卽以太君所處。似常實變。苟狃以舊俗。不以薛爲家。則恭簡且無以自安於楊之室矣。惟其識經權。知輕重。故能周旋於父母舅姑之間。合兩姓爲一家。所以養生送死者。無幾微之憾。俾夫子處變如常。超然無所累其心。乃得成其所學。以永終譽。而伶仃窮露中。又能淬厲諸孤。就其器業。卒使將絕之緒復延。旣衰之宗再振。狀謂其一身繫兩家之重。吾以爲一身補人倫之闕。實裨風教。非第爲二氏之光而已。予故表而出之。以爲世法。處其肅賓虔祀。教忠封鮮諸事。世之賢婦人皆能之。已具狀中。予不復誌也。太君滇之建水州人。父發先公。諱向榮。母林氏。生於順治辛未七月二十一日子時。卒於乾隆己未正月八日戌時。得年八十有五。以子天培貴。敕封太孺人。子六人。天墀。天培。天垣。天塹。天堦。天塏。女二人。孫十六人。女孫十一人。曾孫四人。曾孫女二人。銘曰。

薛卽室於楊。乃昌厥家。婦從其姑。生無嫌乎易姓。而卒復其初。故鬱鬱乎關西之岡。蒼蒼乎雲谷之墟。

陳學士文集卷十五

題辭 跋 引贊

韓歐文選題辭

善畫者蕭然有意於筆外。善言者蕭然有意於言外。見畫雪者。渲其旁空地。又有畫林中酒家者。作竹樹一叢。而酒帘揚出。其不畫者。乃其欲畫者也。古人之文。言在此而意在彼。意無窮而言有止。取而觀之。乃無一語爲人所言。皆人之所不言者也。而後己所欲言者。不待言矣。余每竊窺其旨。笑而領之。有問者。示之曰。閑處著想。冷處傳神。然後墨無溢瀋。筆無塵蹟。任世間忙熱劫中。愈言愈厭。弟輩請其鵠。余曰。惟韓歐陽實闡厥趣。爰以所故習者。標而錄之。仍漫加評註。弟輩試覆之。此文中清涼界也。

題送別江冠羣詩後

同學江子冠羣。有越中行。前二日。置酒招近局。集於寓齋。敘別。宋岸圃。金繪卣。符幼魯。張蔭雲。宸樞。程翼山。夔侶。難弟佩水。各卽席爲詩。以贈其行。俱有餘情於言意外。冠羣自作一首。留別同人。語若自悲。而出之談諧。蓋是行之非歸非游。非飢驅而不獲已。其情深而鑒切。幾明而寄遠。有不可以莊語人者。惟予深知之士。必有以治生。而後出處進退。乃可綽然自得。耕釣屠沽。以及傭書入幕。皆自食其力。其爲伐檀之義一也。受自吾分。不爲苟取。可以資生。吾何擇焉。曩予教讀天津館。穀足以供食口。雖羈客十年。而形

神日王。旣舉進士官京師。不三載而貌已悴。志慮漸耗。忽忽十餘年來。日月不知從何去。頭須爲白。典衣晨炊。乞米晚飯。平生意氣銷鑠盡矣。尙安能修職業。效尺寸於當世耶。坐糜廩祿。欲謝去則無所於歸。長安士大夫如予者亦多矣。此冠羣之所狎見而深悲也。人生束髮受書。求一第往往不可得。幸而得之。又幸而居詞館。不可謂之不遇。徒以治生無術。窮愁困悴。進退遂無一可。然則苟可以食其力而治其生者。義當就之。何亟亟於一第。而自令至是。生理旣具。退而隱。可以樂志。出而仕。可以厲節。夫無待於世者。真能用世者也。予悔當年不爲冠羣。又烏知冠羣之不感於予而決是行哉。問途於已經。諸君子他日是予言。然後知冠羣之早見也。唯岸圃孤雲無依。老鷲鳴歸。迹本不同。而情彌愴矣。

石濤畫黃研旅詩冊題後

清淞老人爲研旅黃君畫詩三十二幅。觀之盪胸駭神。破耳目之格。絕筆墨之蹤。恢詭譎怪。而研旅之詩。於是乎傳聲寫照。纖毫畢現。按圖而誦之。則濤江漱齒。潮海答響。竦身危峰之上。冥心絕壁之下。天風吹窅思而欲絕。空翠泣幽神而欲滴。其殆以我爲伯牙。引而置之海水汨沒。山林窅冥中乎。先生將移我情矣。人生胷中各有邱壑。桃花源柴桑之三徑也。浣花溪杜陵之一枝也。輞川莊維摩之初地也。然在此冊中。不過占樹一叢。分石數皴。翦水半絲而已。吾將以天地爲鎚。造化爲冶。研旅清淞之手與口爲範。聚宇內山川神奇靈曠幽險絕特之氣。踊躍奮迅而出乎詩畫之間。此其胷中邱壑。視昔人爲何如也。或曰。研旅卽景爲詩。淞公卽詩爲畫。皆其身到目遇。而非以意造之。然予以爲山水之觀無窮。而人各領其趣之。

所近。今使右丞爲研旅之遊。而爲詩紀之。並圖其迹。其所到所遇。與今同也。而江山不可復識矣。研旅爲吾溧陽師老友。氣不可一世。嘗以千里赴一言之期。類古俠者所爲。而氣韵沈嘿。無以測其所嚮。於其詩可以想其人矣。聞淞公蹤迹尤奇。惜其沒。不能一見。掩卷悅然。然於此益知世間名籍之外。固多偉人也。

馬文毅公彙草辨疑題後

公致命之節。紀述論贊。諸君子旣彬彬有作矣。予獨於彙草辨疑一書。窺公之深。竊以爲忠智毅烈。皆以其迹言。猶未足旣公之心也。公之心。仁而已矣。孔子曰。仁者安仁。又曰。造次必於是。顛沛必於是。夫造次顛沛。生人之變備矣。而安之若固然。此所以爲仁者也。當公被執時。幽室土窖。瘴癘薰蒸。燥溼寒暑。敝糲蓬垢。賊黨脅誘。沓至百端。並設而公之妻子稚弱。囚繫別所。消息斷絕。計公此時。耳目手足。焦腑肌骸。無一得爲己有。其爲己有者。唯此心耳。而死生利害。攫之於外。悲憤憂思。感之於內。尙何能心摹指畫。作此不急之務。若從容暇豫時哉。今觀其書。凡十二卷。集晉漢以來法帖。依梅氏字彙。一一鉤勒之。一字而諸家之草具。一草而纖毫之異別。其精工研辨。雖明窗淨几之間。意恬手閒之頃。亦未易辦。況如公所處之時。與地哉。苟非心外其身。身外其境。以造次爲從容。以顛沛爲暇豫。死生利害。莫能攫。悲憤憂思。莫能感。其何以至此。此所謂中心安仁者。非耶。孟子曰。仁者人也。耳目手足。焦腑肌骸。具而名人。如果之核。如穀之莖。核與莖之中。有物曰仁。仁之在人。猶是也。故仁其心者。遺身心。其仁者。遺境。苦樂順逆。不得而參焉。孔子曰。志士仁人。有殺身以成仁。夫身旣亡矣。仁將安附。以此知仁不與身亡。仁不與身亡。以此知仁不

與身存也。仁不與身存亡。則安有順逆苦樂乎哉。吾故曰。文毅公可謂仁者也。

楊太涵乞養文稿題後

古之養者。吾聞之矣。聞以子養。不聞以仕養也。今之養者。吾聞之矣。聞以仕養。不聞以子養也。仕與養不可得兼。則何所取。古之人有行之者。舍仕而取養也。今之人有行之者。舍養而取仕也。普安刺史太涵楊公。居今之世。行古之道。其自江南居巢令。移刺黔之普安。太夫人年八十餘。以路險遂不能俱。公卽請於上官。不欲行。不獲請而後就道。既至。又請於撫軍。不可而後視事。繼又請。至六七而後得報。乃予告以歸。今讀其文。言質而情迫。詞遜而意堅。蓋人可終身無官。而不可一日無母。三復誦之。未嘗不感慨流涕也。今之人遠親游宦。遠則萬里。動輒數年。彼亦知其親之思之耶。藉顯揚之虛名。虧依膝之眞愛。假匪躬之大義。薄烏哺之至情。內可解於父母。而慰之以浮榮。外可說於朋友。而折之以臣節。然獨不思爲之親者。天屬綴心。如結不解。當其攬衣晨興。挑燈夜坐。外顧惟影。內顧惟形。徒有僕婢之奉。實無骨肉之親。拊膺傷心。伏枕隕淚。雖身被翟絨。席盈膏粱。復何益乎。榮榮之悲。綈綈之思哉。至若衰疾交攻。隱憂並日。則又有不忍言者矣。嗚呼。此楊公之行之所以不可及也。且夫今之人。亦有類楊公之所爲者矣。人吏部檢仕籍。乞養者何可勝數。而求其故。或不悅於上官者也。或不任夫繁劇者也。否則民不安其政而謗騰者也。否則其有誑誤而懼不免者也。藉以解目前之紛。而預以開後仕之路。此勢出於不得已耳。若其得已。則其親仍不得有其子也。楊君之爲普安。其撫軍則宛平王公。與有疇昔之知。見公至大喜。方將大用公。甫

蒞任卽以之攝安順太守事。則公固已獲乎上矣。普安政簡而民樂公之仁。案牘不盈而公才足以游刃。則又非繁且劇。民訛而懼不免也。使公稍留二三載。以王公之知公。公之能於理。顯擢要任。豈顧問哉。而公終不以彼易此。則甚矣公之行之爲不可及也。予將以公之行爲人子勸。而以自勉焉。故書其後如此。

宋文修廬次集題後

二宋之毀。吾聞之矣。愛之者不勝憂。稱之者不勝嘆也。今觀文修廬次之詩。有不暇憂以嘆者。甫展卷而悽然之色。若接吾目。愴然之聲。若入吾耳。惻然之神。若觸吾心。不能卒讀。輒掩卷而起。已取而讀之。又復然。至於再四而未已也。然後既嗚呼。詩之感人。一至是乎。抑情之至者。其感發在語言聲響之外。作者與讀者俱不知其然而然乎。然則向之憂且嘆者。見孝子之貌。而吾於是詩。見孝子之心也。夫忠孝異名而同實也。余生平不能讀離騷。每一讀之。則煩冤侘傺者竟日。然恨黨人之媮樂。懟靈修之數化。慷慨不平之氣。勃然而生。固已散其鬱抱。激爲變徵矣。未若蓼莪一篇。陟岵數語。令人誦之魂銷。釋之氣盡也。夫孝子自寫其心。而嘉慶者興愛日之思。罹憂者懷風木之痛。然則孝之感人。固甚於忠哉。請以質之文修。其以予言爲然否也。

五芝樓文稿題後

右文一卷。計如干首。姑丈紀劇亭先生自訂所爲舉業之文而藏之家者也。憶予童少時。日夕省姑母。與表弟寅東戲。各矜誦習。角所多爲勝。汨汨如瀉餅水。姑丈聞而憐之。贈以昌谷詩二冊。當是時。家門方鼎

盛常於筆花軒蒔菊百種。花時招近局。觴詠彌旬。姑丈才思敏絕。鉢響輒就。往往屈其座人。一時流輩莫不斂手相讓。予既稍長。知爲文。王霞村先生啓社南樓。名雋畢集。予遂遂占末席。諸老宿心輕之。姑丈獨以其俊見賞。每日此子咄咄爲來逼人。凡所爲文。嘗與商榷。忘年與分。務盡人懷。其虛衷雅量如此。庚午。闌中以元擬復失之。然喜予之獲售。不概於中。爲文益刻厲。曰。失得偶耳。意中人得之。詎庸非得之耶。一日呼予過五芝樓。案上積卷帙尺餘。皆平日所讀文。率手鈔者。謂予曰。吾病文思之綺而不清。毋乃多爲累乎。取火悉焚之。煙漲天。於是冥心孤詣。窮文境之變。當其興酣搖筆。輒輒千言。如高山出泉。風雨雜至。若乃含毫邈然。神遊象表。筌蹄兩忘。手心俱化。一語不從人間來也。有時鬱勃淋漓。霞蒸雲矗。忽而斂息屏氣。如蒲團夜寂。鐘氣欲殘。希乎微乎。鬼神不得參其解也。自是知者愈希。向之斂手者。羣非笑之。而家亦益落。不自存。授徒四方。又以方柄多齟齬。而襟度超然。不以屑意。獨以文自娛。所作益多。歲乙酉。受知於高芸軒先生。魁其經。累上春官。不第。予之齒少姑丈二十年。其窮窘同。其久阨名場同。其耽奇嗜古。不顧世人之非笑同。予猶九剋而倖一遇。而姑丈猶含其璞也。年且七十矣。豈遇合之夙暮。果有司之者歟。抑孤情絕賞。自古爲難。不遇其常。而遇者其偶也。一日。哀文稿手以示予。曰。予之爲此。其勤且苦。子所知也。序吾文者莫如子。予受獎誨。垂三十年。其敢以鄙言爲弁。然自童少所記。迄於今。情事歷歷。未嘗一日忘。輒略述之。以志予與姑丈情好之篤。有出於懿親肺腑附之外者。又於今昔盛衰之際。不能無慨然也。

所居無赫赫名。去後輒見思。兩言耳。循良之治。悠然可想。至峴首羊碑。過人墮淚。去後之思。不煩辭說。千載下。但覺風流未遠也。後世勦襲。轉成弊俗。乃至無地無官。不貽災珉石。紛然林立郭外。令見者厭唾。不忍視。遂使古人佳話妙迹。塵穢都盡。今延人所立郭使君碑。獨能令過客詞人。唸覽低徊。慨然成詠。抑獨何歟。豈途次風謠。感心觸耳。碑間幼婦之辭。皆斑斑淚沁耶。若然。則過而覽者。莫不爲之躊躇而悽愴。宜乎使君舊治重來。感民情之厚。次韻留題。有裴回欲涕也。舍人回轡。見壁上之作。又從而和之。古驛荒途。寒山片石。遂爾騰韻流徽。頓留勝蹟。都人士聞而和者日多。哀然盈帙。予索而觀之。竊謂得此。可爲叔子解穢。洗出峴山眞面目矣。卽以之題於冊後。

題熊滌齋秋江垂釣圖

有扁舟而釣於江上者。煙波渺然。其面目不可狎而識也。其形神閒而遠。彷彿成連海上之意。噫。此何人哉。有漁父過而識之。語人曰。此夫少喜名俠。所謂不侵爲然諸者也。早踐亨途。猝蒙大難。其事友人實尸之。歸自天津而後。以聞。則禍機已構矣。友人懼。慨然曰。忌我者唯余是求。卽言之。不足戢其意。徒兩陷何爲。吾終不言。竟抵罪。卒無所言。已而友人與所親閒語及之。人始聞之。此人情之所難也。厥後曾爲朱邸客。又嘗客於將軍積雪之家。人皆以爲遇。乃醴酒方殷。而冥鴻逝矣。藥言不入。則褰裳去之。人皆不知所謂。泊戀棧者。悔禍於噬臍。濟水者。淪胥於及溺。然後歎其知之早。見之決。守之定。利勢不足累其心。私恩不足廢其迹。超乎其不可及也。而謂其覬餘榮於故相之遺疏。以圖僥倖。有是理哉。是以君子之論人也。

貴路迹而求情。可因此而識彼。伊尹負鼎。百里飯牛。雖功名顯鑠。而談者猶以爲口實。自子輿氏辭而闢之。而世俗之疑。乃破。夫以古之聖賢。尙猶遭此。何論餘人乎。世好以牛鼎信人。而不復衡其本末。宜夫人之屏迹逃名。持竿長往。而不顧也。其人聞之。泛然而不應。曰。彼所言。皆故我也。今者吾喪我。於是扣舷而歌。曰。江水滿兮悠悠。見往者之不返兮。知來之不留。吾旣與之偕逝兮。夫於世乎焉求。又何患乎大力兮。負山壑之藏舟。

題李璞庵小照

李子璞庵。以其小照介孫君。又璘屬予題。纔展卷。眉目髯頰。望而知爲璞庵也。予識璞庵。以去年四月。亦又璘言其行義修潔。故心儀之。今覽卷中題贈。多以陶彭澤相方。豈以其嘗爲令。移病歸來。遂附之五柳門庭歟。然吾聞璞庵之起也。以孝廉方正。詔赴闕廷。聖天子賜見使殿。時同舉者十四人。上親擢爲令者二人耳。璞庵其一也。餘皆授學博。然則璞庵受恩特達。固不與靖節等分符龍城。士民安其教令。去之日。祖送塞途。璞庵亦賦詩與別。情懷悽惻。一時上官慰留不獲。莫不嗟而惜之。詎有鄉里小兒作督郵。面目相逼耶。今璞庵顏沃丹。鬚眉奕奕。卷中人故無恙也。而安於隴畝衣食。無再出之意。予竊疑而不得其故。又璘曰。璞庵退慎人也。家本無贏。嘗授生徒自給。而嚮身力用。積有中之產。初被州里察舉。苦辭不能免。旣召見授官。每惕惕不遑寢食。曰。臣無狀。何以報稱。孤恩尸祿。生有餘愧矣。若有重憂於其心。而重負於其身者。故不能不病。病不能不去官。至蕭人之安於令。上官之信於令。璞庵不以自安而自信也。予嘗

徵其說。則曰。令之職。匪直以篋篋刀筆。應大府之徵發。期會而已。吾民果有以自食耶。吾地之利。果足以食人耶。何以俾其不逐奸利而食不乏也。民心何以猥薄。廉愧何以不復。父兄骨肉。何以不相收卹。富貧何以相役。強弱何以相凌。吏胥何以力勢過官府。人倫乖紕。何以仍齒衣冠。狗鼠偷竊。何以重煩案牘。官是縣者。以知爲名。吾知蕭。吾不知蕭也多矣。而第曰蕭人安我。上官信我。遽訑然曰。蕭之事。予旣已知之矣。因以苟冒其祿。而猶幸其速化焉。仰惟聖天子勤求民隱。慎擇司牧之盛心。豈端使然哉。一念及此。惄然懷疚。就閒釋負。而後患始去。予聞而寤之。璞庵之病也。今人之所不病也。而祿日以崇。而貌日以充。而形日以倨。而氣日以矜。然其神者不與也。苟圖之。以示其生平之舊。將不識其誰何。若璞庵以病去官。其病病者未嘗病。未嘗病者神也。圖其神則無不識者。璞庵自視。得其故我。吾輩視之。如對故人也。又璘曰。善。卽次其語而爲之序。

陸筠巢小照題後

世之人。往往令人圖其面。比櫛鬚頰。較量眉睫。唯恐其不肖也。然而顧陸復生。窮思殫技。卒不能肖。蓋世人有種種面。與接爲變。或熱也如日。或殺也如秋。或悽然若啼。或猶然若笑。或訑訑而似拒。或欣欣而似迎。機發操於勢力。態色幻於俄頃。今乃使之具衣冠而坐。眉目口耳。各復其故。而從旁執筆摹之。縱復極肖。見者不識。見者見其變面。未嘗見其常面也。吳門陸筠巢。予與之游五年矣。始終作如是觀。筠巢之客於津十年矣。與之游者。如予什伯而未已。亦始終作如是觀。且夫十年之中。所接達官富人。與夫四方之

游士。墟市之孤寒。方外之幽逸。狹斜之年少。華堂舞席。詩場酒社。禪榻道院。氣而矜者。綺而市者。禮而俗者。俳而謔者。寂而枯者。百方陳乎前。而筠巢總以此面對之。不沾沾而喜。不倖倖而怒。苟非心超乎形勢。而志齊乎得喪。何不改乎此度也。年六十。友人命工者圖其面。面甚肖。見者無不識之。各爲詩題其後。積成卷軸。予不能詩。聊記數語於末。見筠巢生平無兩面。後之人覩筠巢之面者。可以知其所養矣。

題潘平山小照

先生人莫能名其質也。特以其形目之。故儒者見之謂之俠。俠者見之謂之儒。穩者相遇於方之內。而游乎方之外。少時有友。當遣戍亡命。父子相扶挈而來求舍。先生與之田廬而匿之。久之。爲怨家所發。幾獲罪。然卒振之。俾安行達戍所。先生好客。客至呼酒飲極歡。盤榻屢進。竟夕。或值匱乏。則夫人及諸子典衣供之。先生不問也。喜餽遺於貧交。故平生無長物。而意氣豁然。不以有無措意。張他山者。畸人也。披髮跣足。行歌於市。嘗赤體臥雪中。或鑿冰而浴。兼旬絕粒。人與之食。食兼數人。性嗜酒。呼酒爲風。醉則作長短歌贈人。語不可曉。然往往奇中。金撫軍好道家言。求見之。輒避匿。獨睨就先生。先生亦狎之。每與談經世大略。古今豪傑所以成敗。奮髯抵掌。辭氣激揚。感慨他山。則引滿浮白。酣然相對。所贈先生及諸子歌辭甚多。先生子四人。長南垞。氣骨雄俊。如太阿出匣。光霍霍逼人。次大川。抗直無枝葉。而性一往獨至。次南溪。落落無近情。人不得而親疎之。南垞與予同年。交最善。大川、南溪。予皆弟畜之。獨未見其季耳。夫蛟龍所生。必深山重淵。然後能蘊其奇怪。而神其變化。三子豪俊若此。則先生爲人。更何如哉。於茲圖覩先生。

之貌。參以平日所聞於南垞者。可以想其髣髴。然終莫能名之。先生號平山。黔之清鎮人也。

題汪野夫小照

六百丈。皖江一曲也。有一老人。獨棹小舟。嘗以雪中垂釣古柳下。其人癯而頽然。顴頰間具有邱壑。目深碧。爛爛射人。往來估帆。或窮途客。昏暮抵此。甚寒。天風驚濤忽起。往往依之以泊。老人與之茗飲。偶言前途夷險。語多出其意外。初不信之。然輒應。南北之人。咸共傳說。於是過六百丈者。無不繫舟古柳下。冀聞老人之一言。多不遇。無意則又見之。已乃隱迹不復見。人皆疑而怪之。或以爲仙。好事者圖其概而傳焉。有識之者笑曰。此桐城汪野夫臯也。問途者自神所遇。多與之爭。旁人疑信半。旣而野夫游京師。居然柳下老人也。轉相詫語。造而問途者踵至。野夫曰。余將復入畫中。隨忽不復見。

題朱奕韓小照

此朱子奕韓小照也。方今上嗣位之初。奕韓條奏時事幾萬言。詣通政司上之。通政使大駭。拒不受。奕韓侃侃言。聖天子新政明作。欲周知四方利病。言路當大開矣。公等尙泄泄耶。某草莽臣。何所冀。誠願效其一得。爲士大夫先。如候蟲應時而鳴耳。公司喉舌。乃欲率天下默。公獲罪不久矣。遂拂袖去。當是時。人皆笑其狂生。已而詔在庭諸臣。雖無言責者。各以所見奏聞。其可者立見施行。於是國計民生。幾無遺策。人又以服奕韓之先見也。予識奕韓於圖園先生眞州署中。溫溫恂恂。隨諸賓友後。載筆記籍而已。初不可否事。及圖園入都。部督交訐。勢蓋岌岌矣。而計畫條答。皆出奕韓。機敏從容。常若無事。圖園乃嘆知朱君。

晚也。於是奕韓名大著。諸大吏爭欲致之幕中。邀以重糈。奕韓笑曰。我爲張公來。不終而他就可乎。謝之。不令圖園知。然予固知之久矣。圖園事旣白。天子召見便殿。嘉慰備至。賜第寶金。以旌其廉。擢貳鴻臚。以休其病。而圖園以年滿七十致仕去。人皆高其節。然亦奕韓贊決之也。圖園未行前。託奕韓赴許州。佐王刺史灼三受代。許爲入黔道所經。王刺史留奕韓住。俟張公來取別。奕韓不可。趨駕北來。遇圖園邯鄲道上。話一日乃別去。其爲人有終始。不苟去就如此。今將歸江南。來別余。出小照相示。索題。有同年生潘元亮。蔣惟玉句在焉。予不能詩。聊次奕韓才識節概。書之於卷。俾覽斯圖者。知水邊樹下。科頭跣足人。其平生大略如是也。

題蔡中山小照

以此貌中山。可謂得其似矣。曾是以爲中山乎。雖顧陸爲之。亦似焉耳矣。其挺然而不回。介然其不可移者。非筆墨之所可傳也。然善畫者。每寄意於所貌之外。峨峨長松。稜稜孤石。而以中山位置。蔭坐其間。吾烏知畫者之意。之不以松石之挺然介然者。傳其不可傳者耶。貌得其似。合吾說而觀之。可以得其全。形神宛在。雖謂畫者爲顧陸可也。

題謝繡峰負米圖後

右圖一卷。繡峰自寫其奉母避亂石城。負販往來。弛擔中路之狀也。倚巉崖。蔭古木。敝衣見肘。草履踵決。童顛蒼顏。厥容宛肖。然以年計之。繡峰是時。纔十七八耳。而圖中人則居然今之老畫師。何也。繡峰之父。

不逮負米之養。每悵然心悲。顧猶得奉兩母歡。雖勞苦倦極。訴訴有以自樂也。母沒之後。慕之老而不衰。回首涕淚。求如石城時。負販供甘旨。邈難追矣。故圖以志愴。而當時面目。既不復記憶。乃圖今狀。亦足見其形雖衰。而心尙孺。精神未嘗一日不在其母之左右也。此蓼莪之痛。南陔之義也。繡峰既壯。遇異人授傳神之技。以筆墨遊士大夫間。其爲人真率恬泊。士大夫皆愛重之。家以小康。母之奉養備。且得善地葬。其懸棺十有一世。來京師。預校理纂修館。受品服以歸。繡峰之先。至其父四世。俱以明經爲廣文家。饒財甲於一邑。耿逆之亂。籍富人充餉。家破。父憂憤卒。乃身奉兩母逃去。間行攀緣山谷間。遇絕險。兩母悸眩不能前。繡峰負以過。蛇行猿蹕。瀕危而脫者數矣。同行之人。皆曰。謝孝子云。其童少時。便能作畫。意與境會。卽寫以自娛。竹樹水石尤工。在石城。嘗畫數紙持入市。終日無顧者。不得已。乃隨人負販。奔走數百里。飢渴寒暑。諸苦備矣。然卒賴畫以康其家。以養生送死。庸詎知負擔之苦。非天之所以試孝子而堅其志歟。覽斯圖者。烏哺之情。可以油然而興矣。繡峰名衰。閩之連城人也。

題秋江月夜舟畫卷後

嘗誦詩兼葭三章。蒼涼絳綳。恍然身坐江天煙靄中。荻葉鳴風。秋容染水。不知所懷何人。第覺一往情深。我淚爲之涔涔下也。欲得工畫者圖之。爲千古懷人寫照。然境過清。秋旣晚。悵悵增歎。逍遙焉泊。廬中人豈非窮士乎。辛丑九月。客眞州。圖園兄出畫卷見示。題曰秋江月夜舟。自爲歌行賦其事。復綴以近體三首。結念燕雲。關心蜀道。溯洄宛在。雖以予之不肖。一時頓生羽翼。來自楓林。共茲江月矣。反覆循覽。能無

慨然。睇觀其圖。方不逾尺。而江山遼落。居然有萬里之勢。夫畫家寫秋易。而寫新秋難。寫夜秋尤難。蓋搖落可貌。以蕭疎。而清明猶未離乎蒙密也。今則意取微茫。態兼濃淡。波光增明。林葉生影。帆懸風正。舟靜人閒。居然遺世獨立。望者以爲登仙。非復石瀨飛龍。弔靈均之肅瑟者矣。再咏公之詩。如列子御風。安期渡海。迴視九點煙中。尙不忘其塵侶。臨風怆兮浩歌。君誰須兮雲之際也。僕本恨人。結習愛月。逢秋傷別。尤難爲懷。自茲放舟而南。霞蒼露白。江月窺人。阻長之感。畫中人併結爲秋夢矣。

題駱子曇扇頭

駱子澌人。少有雋才。性洒然離俗。所著書等身。爲詩絕警敏。南北士大夫多知之者。然頭鬚且白。方屑屑爲人記室。四月至此。斂數年契闊。不以遇之不偶戚其心。獨欣然述所得新知。某地某最賢。某地某也才。出其贈答之什。以矜於人。如米襄陽誇石者。大抵皆江淮間幽閒客。無一達官貴人。然駱子平生所見許。達且貴者不少。不過得其一言之譽。卽激昂感慨。誦之不衰。此外不知有求其推挽及干澤事。故卒不得志。可以覘其所養矣。今又逐人行旆。將出都來告別。余旣歎時輩鮮此人。而又恨前期之未易卜也。率題數語爲贈。

跋睫巢名字詩後

予別東溟老人四年矣。時時夢至老夫村。浮白劇談如平日。今晤睫巢。矯矯如雲中鶴。雖在人耳目。終非近玩。因歎仲容之於步兵。趣舍雖殊。風味則一。固宜並在竹林之列。東溟詩予爲之敘。睫巢意以爲可。

乃以名字詩一帙見示。風格大類昌黎。而譎誕窅幻。則蒙莊之汪洋自恣也。婉約幽沈。則左徒之託物比類也。東溟善爲謠。其至者似易林。下亦不減子夜讀曲諸篇。所謂寓言十九者近之。隄巢名字。釋以離騷。正則靈均。美人香草。豈異伊人。固是一鳳耳。善相馬者。略其毛骨。取其神駿。若恤若失。若滅若沒者。野馬也。隅目聳耳。豐臆細尾者。廐馬也。然而加之羈勒。皆可以涉瑤池。奮其鬐鬣。皆可以伏虎豹。予於二龍。固不岐以方之。內外矣。隄巢寓僧蘭。一日造之。秋花滿院。並其手植。壁間自題種花詩一首。力追陶彭澤。予笑謂之曰。君風致不忝前輩。惟飲酒不及。官田種秫。差少此一節。經營耳。隄巢設酒相留。予傾觴引滿。而主人酣適之味。乃過於客。不覺輒醉。踏月攜手出寺門。忽憶津門。與東溟飲香林院中。酒散時。呼小艇過河。風露冷然。煙光無際。恍然者久之。

張圖園孝子圖辭說跋

圖二十有四。邗江陳君農爲之圖。各有辭。說二。答問十有四。則龍標張公圖園之所作也。古孝子心迹。及所以型俗教家之意。亦既深切著明矣。顧古之言者。必身爲之質。使人誦之曰。其人如此。故其言如此。是必不可不如此也。夫然後慨然而興。翕然而信。且從否則。疾呼之不應也。公既以清節聞天下。聖天子辨官論材。以爲衡度焉。先是辭泰州之命。爭吏部堂上。卒迴天聽。得終喪。一時卿大夫爭識其面。顯揚光烈。可謂卓鑠矣。至於庭闈孺戀。晨昏之節。竭力極誠。於古人負米嘗藥。懷橘扇枕之事。至性冥合。世或未之知也。太夫人暮年病嗽。積歲不差。公臥牀下。一聞發聲。輒從睡中驚起。效格格相應爲助。後得一方膏金。

櫻子餌之良已。身自採掇叢棘中。豹子突出。公初不識。亦不駭。聞邊人言。始心悸。繼復入深箐。陟層崖。野雉驚撲。以爲豹也。愕幾墮崖下。太夫人既卽世。行道見金櫻。下馬伏哭。且再拜曰。是嘗救我母疾苦。離離者如昔也。採之將貽誰耶。奉太公正垣先生。色養備至。丙子。壽七十有八。公開筵徧召族黨。演劇爲壽。里中子弟更起登場。博太公歡。觴酌沓進。終日無酙容。公於衆中衣冠而出。太公不辨也。是哲而順者誰。父老曰。新來子弟欲奉一觴。公則捧巨觥前跪。太公熟視之。始大笑曰。兒乃太劇。欲效萊子舞乎。是夕歡飲至醉。公之承顏娛意。皆此類。黔楚間人往往能言之。予獲交於公久。情同弟昆。故知公家事最悉。聊述一二。俾覽斯圖者。知公之綴辭雅詠。皆以自道本懷。而粉墨崢嶸。不過假其生面。夫亦可慨然而興矣。雖然。予爲此言。予則滋媿。先大人見背時。笑語未終。大期忽至。身爲人子。未獲一夜臥牀下。奉湯藥。終天之恨。沒世何追。而老母在堂。年已八十有五。數晨夕。怡心顏。尙懼日月之馳。乃復飢驅二千里外。廢定省於行塵。繫慈懷於蓬轉。非人非子。其於公之賢不肖何如也。

募建陡河龍祠疏引

陡河。其源館水。出遷安之館山。屈曲演漾。歷灤入豐。會九派爲一流。經唐山之麓而益大。山下泉聲淙淙。然。雋聞七十有二。今可見者十餘而已。山上有龍祠。祀像五。其位於右者。風貌毅然。土人言。自明天啟間。乘山漲至。開平居民卜祠。不許。卜祠於唐山吉。遂啟宇奉焉。靈異特著。祈報者無虛月。祠僧乃擴其宇。而增設四像。是後盼蠻稍衰云。去歲五月既望。予以禱雨拜祠下。私祝於神明。以爲雨禁絕重。若不獲請。則

發水盈河。以資溉注。越三日。微雨。又十日。而水大至。營田十圍。決決鬱鬱。自是經旬。卽水至。雨亦弗愆。歲以有秋。凡我農人。咸食神惠。乃進其髦耆而告之曰。爾田爾里。故濱海之沮洳也。萑葦之宅。而鼃蛇所游。雖有墾藝。十不稔二三。自雍正四年春。賢王奉天子命。來咨來度。沿陡河之濱。戾止茲土。謂是於田爲宜。旣奏報可。乃出內藏爲之開築。引流成田。歲以遞增。以圍計者十。以畝計者五六萬而未已。八載以來。秔秔積場。秔稻滿家。公私給而俯仰裕如。無一非帝力也。而吾以爲神之嘉惠。卽於是乎在。夫聖人利民之道。必相水土自然之利。因而成之。若此地而無陡河。則焦礪斥鹵之區耳。雖欲引灌。安所取而給諸。今陡河自唐山來。遠匯衆流。近挾諸泉。至十家沾以下。而紆繞縈迴。左環右抱。故爲留頓。不肯卽行。以供人之挹注。雖園圩未建。而形勢固已宛然矣。是以賢王一見而留意。營田增廓而皆成。蓋陡河之神。預設以待盛世之經營。默相而成。斯民之樂利也。然則食其德而被其澤者。其可不思所自哉。父老多士咸曰。唯唯。吾儕蒙休於茲河。欲祠而祀之也久矣。第未識陡河何神。祀將誰主。予應之曰。水泉之源。必有神龍居之。神井靈湫。皆著記載。況茲河之澤民潤物。佐聖天子。愛養元元。功施顯著者乎。且唐山之像。浮水而下。擇地而居。興雲雨。吐淵泉。又已彰彰如是。而山僧愚朴無識。妄增像設。夫神有專司。自宜特祀。而像具五方。神之所以不享也。年來功德。加於此地者。獨厚。毋亦神意欲啟宇於茲乎。專爲之祠。卽肖唐山之靈貌。以爲之像。或亦神之所樂居也。衆意欣然。請□□□□□□□□於是不書。

重修張相公廟募緣疏引代王仲平先生

距縣治西北僅三里。曰相公莊。以唐幽州節度使張公仲武得名。公屢破回鶻功高。大中元年。加同平章事。其稱相公固宜。莊左有祠。祀公祖銀青光祿大夫仁憲。祠北道旁。穹碑巋然。李儉爲之銘。敘世次官階甚備。按仁憲贈止工部尙書。未加中書門下之號。而土人亦曰相公廟。何也。豈仲武勳名卓鑠。不顯厥世。故重公者。稱其官以榮其祖歟。抑幽州一道。縣所隸屬。而北近關隘。蕃部出入。殺掠無甯歲。公以雄武。奏其壯猷。所摧破者七千餘帳。拓疆千里。井閭無烽燧之警。得安於畎畝衣食。以樂生送死。然則受公之賜者。雖草木茂舍。皆將愛而名之。況其皇祖之廟歟。廟肖像三。中偉丈夫。衣製甚古。尙書公也。左右兩女子。冠帔儼然。則尙書夫人也。庭有棗一株。大可蔽牛。相傳尙書手植。輪困如枯木。然數年輒生一枝。自唐迄今千餘載。五代之季。地入於遼。兵燹相尋。都邑陵谷之變遷。不可勝數。而是廟名址照然。屢廢復興。豈非功德之在人者。卒不磨滅。而祠奉既久。神爽式憑焉。斯亦誠之不可掩者乎。予歸自滇南。展墓之次。步過廟中。垣屋傾圯。像剝落不可復識。庭中古棗。根株悉亡。爲之惘然增悵。卽欲倡而復之。力薄歲歉。常苦未能。然每懷悵快。如有負焉。憶昔先廷尉嘗新斯宇。課余兄弟讀書其中。春秋佳日。杖履時及。數十年來。累形夢寐。今予已七十有三矣。闕茲弗爲。終恐不及。故悉力以爲之。先而鄉之父老來言曰。相公之神。福我生聚。不知年矣。自廟貌之廢。祈報漠然無向。朝夕過墓道。瞻豐碑。輒欲流涕。誠不自知所以也。聞公有意妥神之靈。衆情奔踊。畚鍤之役。誠無所愛其勞。予惟名蹟所留。有舉無廢。又禮有功德於民者。沒而祀之。公之功名。昭炳史冊。其德於斯土也。久而不忘。一碑一祠。邑乘借以爲重。而千年勝蹟。一朝聽其湮沒。

斯亦士大夫所共悲愴也。用敢疏其事。以告同志。爲之協力焉。

陳母張孺人八十徵詩引代同年潘元亮

世稱婦德。率溫惠淑慎。以爲賢。乃若識卓見遠。爲丈夫之所不及者。蓋往往而鮮也。詩列周姜。仲任太妃。歌詠彬彬矣。然孔子論列十臣。待邑姜而後具。則其才識計略。甯出呂周召畢下哉。而詩不之及。何也。史傳記婦人^者之奇者。代不乏。求之近今。耳目所及有限。必多湮沒而不章者。苟有其人。所當表而出之。以備史氏採掇。登諸簡策。不宜聽其泯泯也。予嘗與同年陳子淵論次所聞。因得其伯母張孺人數事。欲爲文紀之。而今年十月十有三日。孺人壽登八十。同里諸君子。將博徵篇什。爲兕觥之介。屬予爲之引。予不能爲駢辭。且欲以著實行也。遂據所聞質言之。孺人前鄉貢進士璧輝張公之女。冠軍使獻廷陳公之婦也。二公同居京師。相慕悅。爲婚姻。當明之末造。國步將蹶。而舉朝泄泄。每相對扼腕流涕。及懷宗殉社稷。天下無一旅勤王。獻廷公奮不顧家。陰結豪傑壯士五百人。間行出關。乞師本朝。誓雪讎恥。而王師方入討賊。途遇之。命爲前驅。賊平。論功授冠軍使。協掌鑾儀事。階正二品。而璧輝公自是杜門。不復與人間事矣。孺人通敏沈毅。舉錯出人意表。獻廷公每奇之。曰。吾子子立。且恐不祿。了我家事者。必新婦也。獻廷公有女。歸黃氏。舉一子而寡。黃姥。繼室也。翁沒而姥之子婦女夫。羣偈以處。將不利於藐孤。是時獻廷公夫婦皆下世。孺人亦已寡。乃請陳氏長老詣黃氏曰。姥既有子女之奉矣。未亡人不宜共此字也。請暫歸以遠嫌。器什財賄唯姥用。願黃氏有遺脣。田廬貨肆之登籍者。願無預。遂收其券。而以姑歸。同居十年。姥沒。孤

亦成人。乃返其家。富完至今。壁輝公之子。名正宗。國初爲侍醫。事先帝。被寵賚。王公咸敬禮之。其術若神。儒人命子受方。正宗無嗣。盡以篋中書授焉。儒人嘗曰。生世不可無益於人。人有疾苦。投一劑立起之。於吾心獨無校乎。故諸子多知醫。而其季聖虞。特工有求者立赴。日策馬歷數十家。無倦色。或酬之。則大怒。絕去不顧。獨性好酒。諸被活者。爭以遺之。積罌壘高於屋。奉儒人居天津。使氣陵其豪。皆伏慚。而家益貧。以色養。母子之間。忻忻如也。獻廷公歿時。所遺邸舍貨肆之入。歲猶千緡。儒人以孤嫠持門戶。振貸親黨。無虛日。晝夜有偷兒入。旣就執。家人將以詣官。儒人曰。卽到官。罪不至死。其仇我深矣。且庸詎知官吏之不與賊爲市而籍我乎。貽以一緡。縱之逸。後京師訛言封井。民爭取水相蹂踐。儒人家方無以溢米。忽有一人指揮擔夫。以數十箒至。注甕盎皆滿。其人自言。我拉自立也。前二十年。爲偷被獲。感夫人活我。今作步軍校矣。聊以此報一緡之賜。康熙十八年七月。地大震。比舍傾圮。有盡室覆壓者。人心惶悸。不逞之徒。乘以劫掠。儒人傾篋付典庫。質錢積門中。募人掘被壓者。所活數十百人。自是夜戶不閉。而羣偷相戒。無犯。或爲之守閤焉。儒人謂諸子曰。孺子刺舡以脫禍。而獨不聞之乎。典庫之爲我守也固矣。而得錢可以活人。夫傾覆之災。行將及我。我生之不遑恤。甯能恤此長物耶。後貨肆同火。或謂主者沒其入。而以此爲之辭也。當直之官。儒人不應。自是家中落。而處之澹然。然猶阻勉嫁親戚孤女。殯其沒而無歸者十餘人。不以有無爲解。諸子皆能體儒人之志。敦睦任恤。終身不析箸。伯仲早卒。兩弟撫其子女若所出。孫素髻年補博士弟子。能詩。摹漁洋山人。風韻殊似。聖虞子也。予謂儒人才識卓犖如此。惜其不爲丈夫。無能表

見當世。然丈夫之不及者多矣。詠歌而表章之。風雅滋不媿。以視夫無質而爲之文者。其難易何如也。

重修姜氏世系引代母舅仲立

姜世之有世系也。曾叔祖穆虞公實創修之。當是時。姜氏之居此土七世矣。遠祖從遷。及始祖所以內徙之故。具原序中。蓋距今七十餘年。三易世而及小子。相其間之中道。歿者。絕者。貧而流散者。不知其幾。幸而存。有嗣續守邱墓者。寥寥。然而又衰老窮愁。恐旦暮不可爲諱。遂使七十餘年之間。三世之昭穆。湮而無紀。則後之人。欲聞名字而不可得。況其支分派合之詳哉。每與從叔天六公。興言及此。未嘗不相對流涕也。仰惟我高祖中丞公。起家縣令。爲侍御史。歷中外。遂持節撫鄖陽。德澤在人。功名書太史氏。而曾叔祖掖縣公。成進士。才名震一時。我祖太守公。以萬歷壬子雋於鄉。叔祖司李公。復於崇禎丙子雋焉。數十年之間。科第蟬聯。才地爲一邑之最。雖諸親肺附。亦皆登巍科。躋清要。然當時名公卿稱濟美者。推姜氏。此穆虞公世系之修。所爲拳拳懇懇。誠後人勿藉姓以貴也。洎乎今日。姜之爲姜。尙忍言哉。大父行之不嗣者數人矣。父輩之不嗣者亦數人矣。先府君強學勵行。壯年齋志以沒。諸伯叔之年。及乎甲子者。蓋寡矣。六十餘年之久。困於舉場者二十餘人。無一獲雋者。至於今。爲諸生者不三四人。讀書之子弟。不十人焉。而田無中產。居無完宇。飢寒轉徙。不知去在者多矣。至於殘廢衰窮。不能自存。如小子相。又其最也。每中夜念之。徬徨起坐。不恨其身之窮老以死。而深恨祖宗之緒。將遂墜而不可復振。則九原之痛。不知何如也。豈不悲哉。然嘗聞我祖宗。保世以忠厚。未聞有所崇侈。其後不宜終廢。倘有能奮然樹立。振今日之

衰。紹當時之盛者。則姜氏不終於如此。未可知也。而七十年來。昭穆之次。名字之詳。缺然弗載。後世何述焉。謹與天六公諮而錄之。圖次準舊。凡若干世。嗚呼。穆虞公修於全盛之時。所以望後人者。如彼其切也。而況今日哉。

吳澹庵明府像贊

士大夫一涉仕途。便如俳優登場。幻出種種面。雖親戚故舊。已不可復識。欲使工圖之。未知如何著筆。澹庵兩宰劇邑。挫而復振。所更變態多矣。而本來之面。依然在也。是則可圖也。嘗聞澹庵減其產千金。急兄之難。故人非罪去官。有折米之償焉。以告。則輟百金畀之。其行義有足多者。爲治務大體。以息民爲本。雖節目或疎。而惻然不忍之色。中心達於面目。賢於世之所謂能吏多矣。予彌節於茲。與共事者三載。始終皆此一面也。乃爲之贊曰。

桐陰戔豫。幽蘭芬馥。散髮披襟。對此澄穆。拈花忘嗅。手書罷讀。聲杳塵外。超然意足。心忘機械。面無委曲。盎然天真。貯茲便腹。

